



# **UNDANG-UNDANG KECIL KOPERASI PERMODALAN FELDA MALAYSIA BERHAD**

---

**(PINDAAN HINGGA 2018)**

---

KOPERASI PERMODALAN FELDA MALAYSIA BERHAD  
Aras Bawah dan Aras 8  
Jalan Gurney 1  
54000 Kula Lumpur

## **BAHAGIAN I**

### PERMULAAN

1. Tajuk dan mula berkuatkuasa.
2. Tafsiran.
3. Perubahan dari segi nahu, jenis jantina dan bilangan.

## **BAHAGIAN II**

### NAMA, ALAMAT BERDAFTAR DAN KAWASAN OPERASI

4. Nama.
5. Alamat.
6. Kawasan operasi.

## **BAHAGIAN III**

### MATLAMAT, FUNGSI DAN AKTIVITI

7. Matlamat.
8. Fungsi.
9. Aktiviti-aktiviti.

## **BAHAGIAN IV**

### KEANGGOTAAN

10. Anggota.
11. Kelayakan menjadi anggota.
12. Permohonan menjadi anggota.
13. Fi masuk.
14. Ikrar anggota.
15. Penerimaan menjadi anggota.
16. Perolehan hak, kewajipan dan liabiliti anggota.
17. Pemberian undang-undang kecil.
18. Penama.
19. Liabiliti anggota.
20. Hilang kelayakan sebagai anggota.
21. Terhenti menjadi anggota.

22. Menarik diri.
23. Penggantungan dan pembuangan anggota.
24. Penyelesaian wang anggota.

## **BAHAGIAN V**

### **ORGANISASI DAN PENGURUSAN KOPERASI**

25. Mesyuarat agung perwakilan.
26. Pemilihan perwakilan dan urusan mesyuarat agung kawasan.
27. Kehadiran anggota sebagai proksi.
28. Mesyuarat agung perwakilan tahunan.
29. Mesyuarat agung perwakilan khas.
30. Notis mesyuarat agung perwakilan.
31. Kuorum mesyuarat agung perwakilan.
32. Undi mesyuarat agung perwakilan.
33. Pembatalan dan penangguhan mesyuarat agung perwakilan tahunan.
34. Fungsi mesyuarat agung perwakilan.
35. Pengerusi mesyuarat agung perwakilan.
36. Lembaga koperasi
37. Kelayakan menjadi anggota Lembaga.
38. Tempoh memegang jawatan anggota Lembaga.
39. Lucut dan penggantungan jawatan anggota Lembaga.
40. Penamatan perlantikan anggota Lembaga.
41. Mesyuarat Lembaga.
42. Kuorum mesyuarat Lembaga.
43. Urusan mesyuarat Lembaga.
44. Undi anggota Lembaga.
45. Buku minit mesyuarat Lembaga.
46. Kuasa dan kewajipan Lembaga.
47. Liabiliti anggota Lembaga.
48. Tugas pengerusi.
49. Tugas setiausaha.
50. Tugas bendahari.
51. Jawatankuasa Audit Dalaman.
52. Kelayakan menjadi Jawatankuasa Audit Dalaman.
53. Tempoh memegang jawatan Jawatankuasa Audit Dalaman.
54. Kuasa dan kewajipan Jawatankuasa Audit Dalaman.

## **BAHAGIAN VI**

### **ASET DAN WANG KOPERASI**

55. Wang dan Kumpulan Wang Koperasi
56. Modal syer.
57. Yuran.
58. Simpanan khas, deposit atau pembiayaan.
59. Pindahan syer.
60. Penyelesaian modal syer.
61. Keuntungan modal.
62. Kumpulan Wang Rizab Statutori.
63. Simpanan khas.
64. Pinjaman luar.
65. Pelaburan wang.
66. Pemberian pembiayaan oleh koperasi
67. Pengagihan untung bersih teraudit.
68. Dividen.

## **BAHAGIAN VII**

### **AKAUN DAN AUDIT**

69. Tahun kewangan.
70. Penyenggaraan akaun.
71. Resit-resit dan baucar.
72. Perlantikan dan kewajipan juruaudit.
73. Penyerahan buku dan dokumen untuk diaudit.
74. Mengemukakan penyata kewangan dan laporan kepada perwakilan.

## **BAHAGIAN VIII**

### **PELBAGAI**

75. Akaun bank.
76. Mohor dan dokumen koperasi
77. Pertukaran alamat anggota.
78. Penyediaan dokumen untuk diperiksa.
79. Penyerahan tugas.

80. Laporan oleh seseorang yang dilantik mewakili koperasi.
81. Perlantikan Yang Dipertua.
82. Pertikaian.
83. Mendapatkan khidmat nasihat daripada FELDA.
84. Pemeliharaan kerahsiaan.
85. Pembubaran.
86. Akta, Peraturan dan Undang- undang Kecil.
87. Undang- undang Kecil hendaklah mengikat anggota.

## BAHAGIAN I

### PERMULAAN

#### **Tajuk dan mula berkuatkuasa.**

1. (1) Undang-undang kecil ini boleh dinamakan undang-undang kecil Koperasi Permodalan FELDA Malaysia Berhad.  
  
(2) Undang-undang kecil ini hendaklah mula berkuatkuasa pada tarikh ianya didaftarkan oleh Suruhanjaya.

#### **Tafsiran.**

2. Di dalam undang-undang kecil ini, melainkan jika konteksnya menghendaki makna yang lain-

**“Akta”** ertinya Akta Koperasi 1993 dan pindaan-pindaan yang dibuat kepadanya dari semasa ke semasa;

**“Akta Tanah”** ertinya Akta Tanah (Kawasan Penempatan Beramai-ramai), 1960 sebagaimana yang dipinda oleh Akta Tanah (Kawasan Penempatan Beramai-ramai (Pindaan), 1965;

**“anak-anak”** ertinya anak yang sah disisi undang-undang tidak termasuk anak angkat dan anak tiri;

**“anggota”** termasuklah-

- (a) seseorang yang turut sama dalam permohonan pendaftaran koperasi ini dan yang telah menandatangani minit mesyuarat agung permulaan koperasi dan seseorang individu yang diterima menjadi anggota mengikut Peraturan dan undang-undang kecil ini selepas pendaftaran, dan
- (b) sesuatu koperasi asas atau koperasi menengah yang turut sama dalam permohonan pendaftaran koperasi ini dan sesuatu koperasi asas atau koperasi menengah yang diterima menjadi anggota mengikut Peraturan

dan undang-undang kecil ini selepas pendaftaran, sebagaimana yang ditakrifkan menurut seksyen 2 Akta Koperasi 1993;

**“arahan”** ertinya arahan-arahan yang dikeluarkan oleh Suruhanjaya Koperasi Malaysia kepada koperasi dari semasa ke semasa;

**“aturan-aturan”** ertinya aturan-aturan yang dibuat oleh Lembaga dari semasa ke semasa bagi melaksanakan mana-mana aktiviti yang dijalankan oleh koperasi tertakluk kepada peruntukan Akta Koperasi 1993, Peraturan, undang-undang kecil dan kelulusan mesyuarat agung perwakilan;

**“deposit”** ertinya suatu jumlah wang yang –

- (a) diterima atau dibayar atas terma yang kena dibayar balik, dengan atau tanpa pulangan atau faedah atau dengan suatu premium atau diskaun; atau
- (b) diterima atau dibayar atas terma yang kena dibayar balik, sama ada keseluruhannya atau sebahagiannya, dengan apa-apa balasan berupa wang atau nilai wang,

dan pembayaran balik itu adalah sama ada atas permintaan atau pada suatu masa atau mengikut hal keadaan yang dipersetujui oleh atau bagi pihak orang yang membuat pembayaran itu dan orang yang menerimanya, tidak kira sama ada transaksi itu diperihalkan sebagai suatu pinjaman, pendahuluan, pelaburan, simpanan, jualan atau jualan dan belian semula, tetapi tidak termasuk wang yang dibayar secara bona fide:-

- (i) dengan cara suatu pendahuluan atau suatu pembayaran sebahagian di bawah suatu kontrak bagi jualan, sewaan atau peruntukan lain harta atau perkhidmatan, dan kena dibayar balik hanya dalam keadaan bahawa harta atau perkhidmatan itu tidak sebenarnya dijual, disewa atau selainnya diperuntukkan;
- (ii) dengan cara jaminan bagi pelaksanaan suatu kontrak atau dengan cara jaminan berkenaan dengan apa-apa kerugian yang mungkin berbangkit daripada ketidaklaksanaan sesuatu kontrak; dan

- (iii) tanpa menjejaskan subperenggan (ii), dengan cara jaminan bagi penyerahan atau pemulangan apa-apa harta, sama ada dalam suatu keadaan baik yang tertentu atau selainnya,

dan hendaklah termasuk wang yang didepositkan oleh mana-mana orang dengan koperasi ini dalam suatu akaun tetap atau akaun simpanan atau akaun deposit lain tetapi tidak termasuk syer, yuran atau simpanan khas, sebagaimana yang ditakrifkan menurut seksyen 2 Akta Koperasi 1993;

**“dividen”** ertinya bahagian keuntungan koperasi ini yang dibahagikan di kalangan anggota-anggotanya mengikut kadar modal syer dan modal yuran yang dipegang oleh mereka, sebagaimana yang ditakrifkan menurut seksyen 2 Akta Koperasi 1993;

**“elaun”** ertinya saraan yang dibayar kepada seseorang anggota Lembaga atau Jawatankuasa Audit Dalaman bagi koperasi ini sebagai balasan kerana khidmatnya yang diberikan kepada koperasi ini secara tetap;

**"FELDA"** ertinya Lembaga Kemajuan Tanah Persekutuan yang ditubuhkan di bawah Ordinan Kemajuan Tanah, 1956;

**“garis panduan”** ertinya garis panduan yang dikeluarkan oleh Suruhanjaya Koperasi Malaysia kepada koperasi dari semasa ke semasa;

**“honorarium”** ertinya suatu bahagian keuntungan bersih teraudit koperasi yang diagihkan antara beberapa atau semua anggota Lembaga sebagai balasan bagi perkhidmatan mereka yang lazimnya tidak diberi saraan, sebagaimana yang ditakrifkan menurut seksyen 2 Akta Koperasi 1993;

**"kakitangan"** ertinya kakitangan yang dilantik secara tetap atau kakitangan kontrak dan berkhidmat di mana-mana entiti berikut:-

- (a) FELDA;
- (b) syarikat-syarikat atau perbadanan-perbadanan yang berstatus subsidiari yang ditubuhkan dan/atau diambilalih oleh FELDA atau koperasi ini serta memiliki kuasa kawalan dan pengurusan dalamnya; dan
- (c) koperasi-koperasi yang ditubuhkan oleh FELDA;



**”kakitangan kontrak”** ertinya kakitangan yang dilantik secara kontrak yang mana tempoh perkhidmatannya telah ditetapkan untuk suatu tempoh dan boleh diperbaharui dari semasa ke semasa mengikut budi bicara majikan;

**”kawasan operasi”** ertinya kawasan di mana koperasi ini dibolehkan mendapat anggotanya;

**”kesalahan boleh daftar”** ertinya kesalahan yang boleh didaftarkan di bawah Akta Pendaftaran Penjenayah-Penjenayah dan Orang-Orang Tak Diingini 1969, sebagaimana yang ditakrifkan menurut Jadual Pertama dan Kedua kepada Akta itu;

**”koperasi”** atau **”koperasi ini”** ertinya Koperasi Permodalan FELDA Malaysia Berhad;

**”koperasi asas”** ertinya koperasi sebagaimana yang diperuntukkan di bawah subseksyen 4(1) Akta Koperasi 1993, sebagaimana yang ditakrifkan menurut seksyen 2 Akta yang sama;

**”koperasi menengah”** ertinya koperasi sebagaimana yang diperuntukkan di bawah subseksyen 4(2) Akta Koperasi 1993, sebagaimana yang ditakrifkan menurut seksyen 2 Akta yang sama;

**”Kumpulan Felda”** meliputi FELDA, syarikat-syarikat, perbadanan-perbadanan, koperasi-koperasi yang ditubuhkan oleh FELDA dan subsidiari yang dimiliki oleh syarikat-syarikat, perbadanan-perbadanan dan koperasi-koperasi yang ditubuhkan oleh FELDA;

**”Lembaga”** ertinya badan pengelola koperasi ini yang kepadanya pengurusan hal-ehwal koperasi ini diamanahkan, sebagaimana yang ditakrifkan menurut seksyen 2 Akta Koperasi 1993;

**”Menteri”** ertinya Menteri yang dipertanggungjawabkan dengan tanggungjawab pembangunan koperasi, sebagaimana yang ditakrifkan menurut seksyen 2 Akta Koperasi 1993;

**”pegawai”** berhubung dengan koperasi ertinya seorang pengerusi, setiausaha, bendahari atau mana-mana anggota lain Lembaga, dan termasuklah ketua pegawai eksekutif, mana-mana orang yang diberi kuasa oleh Lembaga, Peraturan atau

perintah atau undang-undang kecil untuk memberi arahan berkenaan dengan urusan koperasi ini, atau mana-mana pekerja, sebagaimana yang ditakrifkan menurut seksyen 2 Akta Koperasi 1993;

**"peneroka"** ertinya seseorang peserta rancangan tanah FELDA yang telah menandatangani surat perjanjian penyertaan dalam rancangan dengan FELDA;

**"pelantikan"** termasuklah apa-apa pelantikan atau pelantikan semula, sebagaimana yang ditakrifkan menurut seksyen 2 Akta Koperasi 1993;

**"Pengerusi Eksekutif"** ertinya Pengerusi Eksekutif Suruhanjaya Koperasi Malaysia, sebagaimana yang ditakrifkan menurut seksyen 2 Akta Koperasi 1993;

**"peraturan"** ertinya peraturan-peraturan yang dibuat di bawah Akta Koperasi 1993 dan pindaan-pindaan yang dibuat kepadanya dari semasa ke semasa;

**"perwakilan"** ertinya-

- (a) wakil anggota-anggota individu, yang dipilih di mesyuarat peringkat kawasan anggota-anggota koperasi ini, bagi menghadiri mesyuarat agung perwakilan, dan
- (b) wakil sesuatu koperasi asas atau koperasi menegah yang ialah anggota koperasi ini yang mesyuarat-mesyuaratnya wakil itu telah dipilih atau dilantik untuk bagi menghadirinya, sebagaimana yang ditakrifkan menurut seksyen 2 Akta Koperasi 1993;

**"perwakilan ganti"** ertinya wakil anggota-anggota individu, yang dipilih di mesyuarat peringkat kawasan anggota-anggota koperasi ini sebagai perwakilan simpanan bagi menggantikan seseorang perwakilan yang hilang haknya sebagai perwakilan kerana terhenti menjadi anggota atau menarik diri menjadi perwakilan atau berpindah kawasan;

**"potongan langganan"** ertinya bahagian keuntungan koperasi ini yang dibahagikan di kalangan anggota-anggotanya mengikut kadar banyaknya perniagaan yang dilakukan oleh mereka dengan koperasi ini dan yang daripadanya keuntungan koperasi ini diperolehi, sebagaimana yang ditakrifkan menurut seksyen 2 Akta Koperasi 1993;

**"prinsip koperasi"** termasuklah-

- (a) keanggotaan sukarela dan terbuka;
- (b) kawalan demokratik oleh anggota;
- (c) penglibatan ekonomi oleh anggota;
- (d) autonomi dan kebebasan;
- (e) pendidikan, latihan dan maklumat;
- (f) kerjasama antara koperasi; dan
- (g) mengambil berat terhadap masyarakat,

sebagaimana yang ditakrifkan menurut seksyen 2 Akta Koperasi 1993;

“**pulangan**” termasuklah apa-apa bentuk sewaan, pulangan, dividen atau faedah, termasuk apa-apa fi atau hadiah, yang kena dibayar atau akan diberikan berhubung dengan apa-apa urusan niaga, transaksi atau surat cara, sebagaimana yang ditakrifkan menurut seksyen 2 Akta Koperasi 1993;

“**sabitan**” termasuklah sesuatu dapatan bersalah dan pembuktian kesalahan, sebagaimana yang ditakrifkan menurut seksyen 2 Akta Koperasi 1993;

“**seseorang anggota**” ertinya anggota koperasi yang terdiri daripada seseorang individu;

“**sesuatu anggota**” ertinya anggota koperasi yang terdiri daripada koperasi asas atau koperasi menengah;

“**simpanan khas**” ertinya wang yang didepositkan oleh seseorang atau sesuatu anggota dengan koperasi ini dengan niat nyata untuk menggunakan wang yang didepositkan untuk suatu maksud yang dinyatakan yang dibenarkan di bawah Peraturan, sebagaimana yang ditakrifkan menurut seksyen 2 Akta Koperasi 1993;

“**subsidiari**” ertinya sesuatu syarikat, sebagaimana yang ditakrifkan dalam Akta Syarikat 1965, yang komposisi Lembaga Pengarahnya atau lebih daripada separuh kuasa mengundinya dikawal oleh koperasi ini, atau yang lebih daripada separuh modal syer diterbitkannya dipegang oleh koperasi ini, dan termasuklah sesuatu subsidiari, sebagaimana yang ditakrifkan dalam Akta itu, bagi syarikat itu, sebagaimana yang ditakrifkan menurut seksyen 2 Akta Koperasi 1993;

**“Suruhanjaya”** ertinya Suruhanjaya Koperasi Malaysia yang ditubuhkan di bawah Akta Suruhanjaya Koperasi Malaysia 2007, sebagaimana yang ditakrifkan menurut seksyen 2 Akta Koperasi 1993;

**”syarikat bersekutu”** ertinya sesuatu syarikat yang mana koperasi ini mempunyai hak mengundi yang signifikan di dalamnya, tetapi tidak mencapai tahap sebagai sebuah syarikat subsidiari;

**“syer”** ertinya bahagian dalam modal syer koperasi ini yang disumbangkan oleh seseorang atau sesuatu anggota berkenaan dengan keanggotaannya dalam koperasi ini, sebagaimana yang ditakrifkan menurut seksyen 2 Akta Koperasi 1993;

**“Tribunal Koperasi”** ertinya Tribunal Koperasi yang ditubuhkan menurut seksyen 83 Akta Koperasi 1993;

**“Undang-Undang Kecil”** ertinya Undang-undang Kecil berdaftar yang dibuat oleh koperasi ini pada menjalankan apa-apa kuasa yang diberikan oleh Akta Koperasi 1993 dan termasuklah sesuatu pindaan berdaftar Undang-undang Kecil, sebagaimana yang ditakrifkan menurut seksyen 2 Akta Koperasi 1993;

**“wang berlebihan”** ertinya tertakluk kepada Peraturan, wang yang melebihi amaun yang diperlukan oleh koperasi ini bagi kegunaan segera sebagai modal kerja bagi perniagaannya, yang boleh didepositkan atau dilaburkan di luar koperasi ini tanpa menjejaskan pengendalian perniagaan itu, sebagaimana yang ditakrifkan menurut seksyen 2 Akta Koperasi 1993;

**“yuran”** ertinya jumlah wang yang disumbangkan pada lat-lat masa yang tetap oleh seseorang anggota berkenaan dengan keanggotaannya dalam koperasi ini dan tidak boleh dikeluarkan kecuali menurut syarat yang ditetapkan dalam Undang-undang Kecil atau apabila tamat keanggotaannya, sebagaimana yang ditakrifkan menurut seksyen 2 Akta Koperasi 1993.

### **Perubahan dari segi nahu, jenis jantina dan bilangan.**

3. (1) Jika mana-mana perkataan atau perbahasan ditakrif dalam sesuatu undang-undang bertulis, takrif itu hendaklah diperluaskan kepada segala perubahan nahu dan perbahasan kognat perkataan itu atau perbahasan yang ditakrifkan.

(2) Perkataan-perkataan dan perbahasan-perbahasan yang memaksudkan jenis lelaki meliputi perempuan.

(3) Perkataan-perkataan dan perbahasan-perbahasan dalam bilangan tunggal meliputi bilangan jamak, dan perkataan-perkataan dan perbahasan-perbahasan dalam bilangan jamak meliputi bilangan tunggal.

## BAHAGIAN II

### NAMA, ALAMAT BERDAFTAR DAN KAWASAN OPERASI

#### **Nama.**

4. Menurut subseksyen 7(4) dan (5) Akta, koperasi ini hendaklah dinamakan Koperasi Permodalan FELDA Malaysia Berhad.

#### **Alamat.**

5. (1) Alamat yang didaftarkan bagi koperasi ini ialah Blok J, Anjung FELDA, Jalan Maktab, 54000 Kuala Lumpur.

(2) Koperasi hendaklah memberitahu kepada Suruhanjaya dalam tempoh tiga puluh hari berkaitan tiap-tiap pertukaran alamat menurut seksyen 11 Akta.

#### **Kawasan operasi.**

6. Kawasan operasi koperasi ini ialah seluruh Malaysia.

## BAHAGIAN III

### MATLAMAT, FUNGSI DAN AKTIVITI

#### **Matlamat.**

7. Matlamat koperasi ini ialah untuk –

- (i) meningkatkan kepentingan ekonomi anggota yang terdiri daripada individu, dan
- (ii) memudahkan operasi anggota yang terdiri daripada koperasi asas dan koperasi menengah, mengikut prinsip-prinsip koperasi

#### **Fungsi.**

8. Fungsi utama koperasi ini ialah perkhidmatan.

## Aktiviti.

9. (1) Bagi mencapai matlamat dan fungsi menurut Undang-undang Kecil 7 amnya dan 8 khasnya, koperasi boleh, tertakluk kepada peruntukan Akta dan Peraturan, menjalankan aktiviti-aktiviti berikut-

- (a) Menjalankan aktiviti berkaitan pelaburan termasuk –
  - (i) melabur modal dalam saham-saham, bon-bon, kertas-kertas dagangan, stok-stok, stok yang boleh tukar, saham debentur dan saham debentur yang boleh tukar syarikat-syarikat swasta dan awam;
  - (ii) melabur saham dalam unit trust, tabung-tabung amanah, atau apa-apa jenis tabung atau mengendalikan unit trust, tabung-tabung amanah, pencen atau apa-apa jenis tabung yang ada dan diadakan dari semasa ke semasa khas untuk anggota-anggota dan dengan kebenaran Suruhanjaya;
  - (iii) melabur modal dalam pasaran barangan atau apa-apa jenis barangan yang ada dan diadakan dari semasa ke semasa;
  - (iv) melabur modal dalam perbadanan-perbadanan dan syarikat-syarikat FELDA dan syarikat-syarikat lain;
  - (v) melabur modal dalam pasaran modal dan kewangan; dan
  - (vi) mengadakan khidmat-khidmat pelaburan atau khidmat nasihat pelaburan bagi kemudahan anggota dan bukan anggota;
- (b) menjalankan aktiviti perladangan termasuk memajukan tanah untuk tujuan perladangan atau menguruskan ladang;
- (c) menjalankan aktiviti berkaitan pengurusan dan pembangunan hartanah;
- (d) menjalankan aktiviti pembalakan dan industri kayu-kayan;

- (e) menjalankan aktiviti perindustrian dan pelancongan;
- (f) menjalankan aktiviti kredit dan pembiayaan secara patuh syariah kepada anggota, subsidiari dan syarikat bersekutu;
- (g) menjalankan aktiviti berkaitan perkhidmatan agensi;
- (h) menjalankan aktiviti berkaitan perkhidmatan termasuk percetakan, pengiklanan dan restoran;
- (i) menjalankan aktiviti perbankan, kewangan dan perkhidmatan pajak gadai secara patuh syariah;
- (j) menjalankan aktiviti kontrak dan pembekalan;
- (k) menjalankan perniagaan import dan eksport;
- (l) menjalankan perniagaan perlombongan dan kejuruteraan;
- (m) menjalankan operasi pelabuhan, perkapalan pengangkutan dan perkhidmatan pergudangan;
- (n) menjalankan aktiviti kebajikan anggota, pendidikan dan perniagaan;
- (o) membeli, menjual, memindahkan hak milik, mendirikan, menyewa, memberi sewa, mencagar, memajak, menggadai dan memiliki harta alih dan harta tak alih;
- (p) melaburkan wang berlebihan dalam perkara yang dibenarkan menurut seksyen 54 Akta;
- (q) mengadakan subsidiari di bawah seksyen 19 Akta dengan kelulusan Suruhanjaya;
- (r) menyertai usahasama dan menjadi anggota kepada koperasi-koperasi lain; dan



(s) mengadakan aktiviti lain yang berfaedah dengan kelulusan mesyuarat agung perwakilan.

(2) Bagi menjayakan aktiviti menurut fasal (1), koperasi boleh mendapatkan-

(a) modal dengan cara mengumpul syer, deposit, pembiayaan atau simpanan khas daripada anggota; dan

(b) deposit atau pinjaman daripada bukan anggota dengan kelulusan Suruhanjaya menurut perenggan 50(e), subsekyen 52(2), seksyen 52A Akta dan Peraturan.

(3) Bagi mengendalikan sesuatu aktiviti menurut fasal (1), Lembaga hendaklah membuat aturan aktiviti yang sesuai yang diluluskan oleh mesyuarat agung perwakilan dan satu salinan hendaklah dikemukakan kepada Suruhanjaya dalam tempoh tiga puluh hari selepas diluluskan oleh mesyuarat agung perwakilan itu.

(4) Bagi melaksanakan skim berhubung dengan simpanan khas, deposit atau pembiayaan, menurut Peraturan, Lembaga hendaklah-

(a) menyediakan suratcara berasingan yang menyatakan dengan jelas terma dan syarat-syarat bagi skim tersebut;

(b) mengemukakan suratcara skim itu kepada mesyuarat agung perwakilan untuk kelulusan; dan

(c) mengemukakan satu salinan suratcara yang diluluskan itu kepada Suruhanjaya dalam tempoh tiga puluh hari selepas diluluskan oleh mesyuarat agung perwakilan itu.

(5) Walau apa pun peruntukan Undang-undang Kecil ini, setiap aktiviti yang hendak dijalankan adalah tertakluk kepada peruntukan-peruntukan mana-mana undang-undang bertulis lain.

BAHAGIAN IV  
KEANGGOTAAN

**Anggota.**

10. Anggota-anggota koperasi ini termasuklah-
- (a) seseorang individu yang turut sama dalam permohonan mendaftarkan koperasi ini dan yang telah menandatangani minit mesyuarat agung permulaan koperasi dan seseorang individu yang diterima menjadi anggota mengikut Peraturan dan Undang-undang Kecil ini selepas pendaftaran; dan
  - (b) sesuatu koperasi asas atau koperasi menengah yang turut sama dalam permohonan pendaftaran koperasi ini dan sesuatu koperasi asas atau koperasi menengah yang diterima menjadi anggota mengikut Peraturan dan Undang-undang Kecil ini selepas pendaftaran.

**Kelayakan menjadi anggota.**

11. (1) Keanggotaan koperasi ini terbuka kepada-
- (a) peneroka-peneroka FELDA, isteri dan anak-anak;
  - (b) koperasi-koperasi peneroka FELDA yang didaftarkan di bawah Akta sebagai koperasi asas atau koperasi menengah;
  - (c) kakitangan tetap FELDA, isteri dan anak-anak;
  - (d) kakitangan kontrak yang mana tempoh perkhidmatannya adalah tidak kurang daripada dua belas bulan daripada tempoh mula berkhidmat; dan
  - (e) koperasi kakitangan FELDA dan koperasi-koperasi yang ditubuhkan oleh FELDA.
- (2) Seseorang individu di bawah perenggan (a) dan (c) fasal 1 yang ingin menjadi anggota koperasi ini mestilah-

- (a) warganegara Malaysia;
- (b) telah mencapai umur lapan belas tahun;
- (c) bermastautin atau mempunyai hartanah atau bekerja dalam kawasan operasi koperasi ini; dan
- (d) bukan seorang yang terhadapnya masih berkuatkuasa suatu sabitan bagi kesalahan yang boleh daftar, atau bankrap yang belum dilepaskan, atau pernah dibuang daripada keanggotaan mana-mana koperasi dalam tempoh satu tahun.

### **Permohonan menjadi anggota.**

12. (1) Permohonan menjadi anggota hendaklah dibuat dalam borang rasmi koperasi ini dan dialamatkan kepada setiausaha koperasi atau pegawai koperasi yang dipertanggungjawabkan.

(2) Permohonan menjadi anggota oleh sesuatu koperasi asas atau koperasi menengah hendaklah ditandatangani oleh pengerusi, setiausaha dan seorang anggota Lembaga yang diberi kuasa.

### **Fi masuk.**

13. (1) Tiap-tiap permohonan menjadi anggota hendaklah disertakan dengan fi masuk seperti berikut-

- (a) dalam hal seseorang individu, sebanyak RM20.00 (Ringgit Malaysia- dua puluh); dan
- (b) dalam hal koperasi asas atau koperasi menengah, sebanyak RM50.00 (Ringgit Malaysia- lima puluh).

Fi masuk itu, menurut perenggan 50(a) Akta, akan dikembalikan kepada pemohon jika permohonannya ditolak oleh Lembaga.

(2) Penama atau wakil yang sah kepada seseorang anggota yang mati dan mempunyai kelayakan sebagai anggota mengikut Undang-undang Kecil 11 jika

memohon untuk menjadi anggota dalam tempoh enam bulan selepas kematian anggota itu, tidak dikenakan fi masuk.

(3) Semua fi masuk hendaklah dikreditkan ke dalam akaun untung rugi.

### **Ikrar anggota.**

14. (1) Seseorang individu yang memohon untuk menjadi anggota hendaklah diminta menandatangani suatu ikrar bahawa dia-

- (a) akan terikat dengan Undang-undang Kecil ini dan aturan-aturan aktiviti yang sedia ada serta apa-apa pindaan;
- (b) bukan seorang bankrap yang belum dilepaskan;
- (c) bukan seorang yang terhadapnya masih berkuatkuasa suatu sabitan bagi kesalahan yang boleh daftar; dan
- (d) tidak pernah dibuang daripada keanggotaan mana-mana koperasi dalam tempoh satu tahun.

(2) Sesuatu koperasi asas atau koperasi menengah yang memohon untuk menjadi anggota hendaklah menandatangani suatu ikrar bahawa ia akan terikat dengan undang-undang kecil ini dan aturan-aturan aktiviti yang sedia ada serta apa-apa pindaan yang dibuat dengan sah. Ikrar tersebut hendaklah ditandatangani oleh pengerusi, setiausaha dan seorang anggota Lembaga yang diberi kuasa.

(3) Mana-mana pemohon yang enggan menandatangani ikrar tersebut tidak boleh diterima menjadi anggota.

(4) Seseorang individu atau sesuatu koperasi asas atau koperasi menengah yang telah menjadi anggota dengan sebab turut sama dalam membuat permohonan bagi pendaftaran koperasi ini, dikehendaki menandatangani ikrar menurut fasal (1) atau fasal (2), mengikut mana yang berkenaan, dalam tempoh empat puluh lima hari selepas diterima perakuan pendaftaran Koperasi Kegagalan menandatangani ikrar tersebut boleh menyebabkan dia atau ia disingkir.

### **Penerimaan menjadi anggota.**

15. Permohonan menjadi anggota hendaklah dipertimbangkan oleh Lembaga di dalam mesyuaratnya atau anggota Lembaga yang diberi kuasa oleh Lembaga yang boleh menerima atau menolak sesuatu permohonan itu. Lembaga hendaklah memaklumkan secara bertulis kepada setiap pemohon dalam tempoh tidak lewat daripada tiga puluh hari selepas keputusan dibuat ke atas permohonan mereka.

**Perolehan hak, kewajipan dan liabiliti anggota.**

16. Menurut seksyen 28 Akta, tiap-tiap anggota yang telah menjelaskan bayaran syer seperti berikut boleh melaksanakan segala hak, kewajipan dan liabiliti sebagai anggota, sebagaimana yang terkandung di dalam Undang-undang Kecil ini-

- (a) dalam hal seseorang individu, sebanyak RM100.00 (Ringgit Malaysia-seratus); dan
- (b) dalam hal koperasi asas atau koperasi menengah, sebanyak RM1,000.00 (Ringgit Malaysia-seribu).

**Pemberian Undang-undang Kecil.**

17. Tiap-tiap anggota hendaklah diberi dengan percuma satu naskah Undang-undang Kecil ini. Naskah tambahan akan dikenakan bayaran.

**Penama.**

18. (1) Seseorang anggota Muslim hendaklah menamakan seorang wakil di sisi undang-undang untuk menerima setelah dia mati, wang yang terhak baginya di dalam koperasi ini bagi diagihkan kepada waris yang berhak mengikut hukum Islam.

(2) Seseorang anggota yang bukan Muslim hendaklah menamakan seorang atau lebih daripada seorang sebagai penama.

(3) Seseorang Anggota boleh dari semasa ke semasa membatalkan atau menukar penamaan tersebut dan hendaklah memberitahu koperasi akan perubahan, jika ada, mengenai penamaan itu.

- (4) Penamaan hendaklah dibuat dalam borang rasmi koperasi.

**Liabiliti anggota.**

19. (1) Liabiliti seseorang anggota hendaklah terhad kepada jumlah syer yang dimilikinya sekiranya pendaftaran koperasi ini dibatalkan. Liabiliti sesuatu anggota hendaklah terhad kepada jumlah syer yang dimilikinya.

(2) Liabiliti bekas anggota hendaklah tidak berterusan lebih daripada dua tahun dari tarikh keanggotaannya terhenti, menurut subseksyen 35(1) Akta.

(3) Harta pusaka seseorang anggota yang telah mati tidak bertanggung bagi hutang koperasi ini, sebagaimana yang ada pada tarikh kematiannya, melebihi tempoh dua tahun dari tarikh kematian itu menurut subseksyen 35(2) Akta.

(4) Harta pusaka menurut fasal (3) adalah syer dalam koperasi ini.

#### **Hilang kelayakan sebagai anggota.**

20. (1) Seseorang anggota akan hilang kelayakannya sebagai anggota jika dalam tempoh menjadi anggota, dia-

- (a) tidak upaya dari segi mental;
- (b) seorang bankrap yang belum dilepaskan;
- (c) seorang yang terhadapnya masih berkuatkuasa suatu sabitan bagi kesalahan boleh daftar;
- (d) telah dibuang daripada menjadi anggota di bawah Akta ini dan suatu tempoh selama satu tahun belum lagi berlalu dari tarikh pembuangan itu; atau
- (e) tidak lagi bermastautin, mempunyai hartanah dan bekerja dalam kawasan operasi koperasi.

(2) Sesuatu anggota akan hilang kelayakan sebagai anggota jika dalam tempoh menjadi anggota, pendaftarannya dibatalkan di bawah Akta.

**Terhenti menjadi anggota.**

21. (1) Keanggotaan mana-mana anggota terhenti atas sebab di bawah ini, mengikut mana yang berkenaan-
- (a) mati;
  - (b) menarik diri menurut Undang-undang Kecil 22;
  - (c) dibuang menurut Undang-undang Kecil 23;
  - (d) dipecat dari jawatan atau diarah berhenti oleh majikan atau meletakkan jawatan, jika dia seorang kakitangan;
  - (e) berhenti menjadi peneroka;
  - (f) dipecat mengikut seksyen 22, Akta Tanah (Kawasan Penempatan Beramai-ramai), 1960 sebagaimana yang dipinda oleh Akta Tanah (Kawasan Penempatan Beramai-ramai [Pindaan]), 1965; atau
  - (g) terhenti daripada menjadi anggota keluarga peneroka atau kakitangan.
- (2) Lembaga hendaklah menyingkir mana-mana anggota yang-
- (a) didapati membuat ikrar palsu menurut Undang-undang Kecil 14;
  - (b) hilang kelayakan sebagai anggota menurut Undang-undang Kecil 20;
  - (c) terhenti keanggotaan menurut perenggan (d), (e), (f) dan (g) fasal (1);
  - (d) gagal menjelaskan syer minimum menurut Undang-undang Kecil 56; atau
  - (e) gagal menjelaskan yuran menurut Undang-undang Kecil 57 tiga bulan berturut-turut dengan tiada kebenaran Lembaga.

(3) Seseorang anggota yang telah bersara dari perkhidmatan FELDA boleh meneruskan keanggotaannya di dalam koperasi ini.

21A. Dalam kes kematian anggota menurut perenggan (a) fasal (1) Undang-undang Kecil 21 waris anggota tersebut bertanggungjawab untuk melakukan perkara-perkara berikut-

- (i) hendaklah memaklumkan kematian anggota tersebut kepada koperasi dalam tempoh enam bulan selepas kematian anggota tersebut;
- (ii) sekiranya waris gagal memaklumkan kepada koperasi dalam tempoh masa yang telah ditetapkan, koperasi berhak untuk memperlakukan modal syer anggota tersebut sebagai duit 'Qard' (pinjaman); sehinggalah koperasi melupuskan modal syer anggota tersebut menurut perenggan (d) fasal (1) Undang-undang Kecil 24 sama ada diserahkan kepada mana-mana waris/wasi atau Pentadbir Pusaka; dan
- (iii) setiap anggota bertanggungjawab untuk memaklumkan kepada warisnya mengenai persetujuan ini.

### **Menarik diri**

22. (1) Mana-mana anggota boleh menarik diri daripada koperasi ini dengan memberi notis bertulis dua belas bulan terlebih dahulu kepada Lembaga. Atas sebab yang munasabah, Lembaga boleh membenarkan penarikan diri dalam tempoh yang singkat.

(2) Melainkan tarikh lebih awal dipersetujui oleh Lembaga, maka keanggotaan anggota itu hendaklah terhenti hanya pada hari genap tempoh notisnya.

(3) Dalam tempoh notis itu, anggota yang demikian hendaklah masih mempunyai hak, kewajipan dan liabiliti sebagai anggota.

### **Penggantungan dan pembuangan anggota.**



23. (1) Seseorang atau sesuatu anggota hendaklah dianggap telah bertindak memudaratkan kepentingan koperasi dan boleh digantung keanggotaannya jika didapati melakukan mana-mana satu daripada perkara berikut-

- (a) merujukkan pertikaian atau aduan kepada mana-mana orang selain daripada Suruhanjaya;
- (b) membuat kenyataan dalam akhbar atau mana-mana media massa mengenai koperasi ini tanpa kebenaran Lembaga;
- (c) membuat tuduhan palsu ke atas anggota Lembaga atau anggota atau bekas anggota atau pekerja koperasi ini;
- (d) memburuk-burukkan koperasi sehingga mencemarkan nama baik dan menjejaskan urusan perniagaan koperasi ini; atau
- (e) bertindak di luar etika mesyuarat di dalam mana-mana mesyuarat sehingga menjejaskan perjalanan mesyuarat itu.

(2) Keputusan untuk menggantung keanggotaan mana-mana anggota boleh dibuat oleh Lembaga hanya setelah anggota yang berkenaan itu diberitahu secara bertulis mengenai tuduhan yang jelas terhadapnya dan diberi peluang untuk menyatakan sebab mengapa keanggotaannya tidak boleh digantung.

(3) Tiap-tiap kes penggantungan hendaklah dibentangkan kepada mesyuarat agung perwakilan yang terawal dan dijadikan sebagai agenda pertama, dan anggota yang digantung keanggotaannya itu hendaklah diberitahu secara bertulis tidak kurang daripada lima belas hari sebelum diadakan mesyuarat, berkaitan tarikh, masa, tempat dan haknya untuk membela diri akan dijalankan di mesyuarat itu.

(4) Sebelum mengesahkan atau menyetepikan penggantungan itu, mesyuarat agung perwakilan hendaklah mendengar penjelasan anggota atau perwakilan bagi sesuatu anggota yang digantung oleh Lembaga itu, jika dia atau ia memilih untuk memberi penjelasan, dan keanggotaan anggota itu tidak lucut melainkan jika mesyuarat agung perwakilan dengan undi dua pertiga daripada perwakilan yang hadir membuat keputusan membuangnya.

(5) Sehingga perkara penggantungan keanggotaannya diputuskan oleh mesyuarat agung perwakilan, anggota yang berkenaan itu tidak mempunyai apa-apa

hak dan kewajiban sebagai anggota melainkan hak menyuarakan hal penggantungan keanggotaannya itu di dalam mesyuarat agung perwakilan.

### **Penyelesaian Wang Anggota.**

24. (1) Jika seseorang atau sesuatu anggota terhenti daripada menjadi anggota koperasi ini menurut Undang-undang Kecil 21, semua wang kepunyaannya melainkan nilai syer miliknya, setelah ditolak hutangnya dengan koperasi ini hendaklah dikembalikan kepadanya sebagaimana berikut, mengikut mana yang berkenaan-

- (a) sekiranya seseorang atau sesuatu anggota ditamatkan keanggotaan, dikembalikan kepadanya dengan segera tanpa apa-apa syarat;
- (b) sekiranya seseorang atau sesuatu anggota menarik diri, dikembalikan kepadanya selepas akhir tempoh notis;
- (c) sekiranya seseorang anggota itu hilang keupayaan dari segi mental dan tiada pentadbir atau pemegang amanah bagi hartanya yang telah dilantik, dikembalikan kepada sesiapa yang difikirkan wajar untuk menerima bagi pihaknya sebaik sahaja penerima itu ditentukan;
- (d) sekiranya seseorang anggota itu mati, dikembalikan kepada penamanya atau warisnya atau wakilnya yang sah, menurut seksyen 24 Akta, disyaratkan bahawa bagi seseorang anggota Muslim, pengembalian tidak boleh dibuat melainkan kepada wakilnya yang sah atau kepada Pegawai Pentadbir Pusaka jika selepas enam bulan dari tarikh kematiannya, wakilnya yang sah tidak dapat dipastikan atau tidak dilantik;
- (e) sekiranya seseorang anggota itu tidak lagi bermastautin, mempunyai hartanah dan bekerja dalam kawasan operasi koperasi, dikembalikan kepadanya dengan sewajarnya.
- (f) sekiranya sesuatu anggota itu dibatalkan pendaftaran di bawah Akta, dikembalikan kepada pelikuidasi yang dilantik oleh Suruhajaya di bawah seksyen 74 Akta.

(2) Penyelesaian mengenai syer mana-mana anggota yang terhenti keanggotaannya sebagaimana yang ditentukan dalam akaun teraudit terakhir koperasi ini, hendaklah tertakluk kepada peruntukan Undang-undang Kecil 59 dan 60.

(3) Koperasi ini hendaklah mempunyai tuntutan yang utama di atas segala syer dan hak-hak lain yang didaftarkan atas nama tiap-tiap anggota koperasi ini bagi menyelesaikan segala hutang-hutang dan tanggungan-tanggungan lain anggota itu.

## BAHAGIAN V

### ORGANISASI DAN PENGURUSAN KOPERASI

#### **Mesyuarat agung perwakilan.**

25. (1) Tertakluk kepada peruntukan Akta, Peraturan, arahan atau garis panduan yang dikeluarkan oleh Suruhanjaya dari semasa ke semasa dan Undang-undang Kecil, kuasa tertinggi bagi koperasi ini hendaklah terletak pada mesyuarat agung perwakilan, menurut seksyen 36 Akta, yang padanya tiap-tiap anggota mempunyai hak untuk hadir dan mengundi.

(2) Mesyuarat agung perwakilan hendaklah terbahagi kepada dua jenis iaitu mesyuarat agung perwakilan tahunan dan mesyuarat agung perwakilan khas.

#### **Pemilihan Perwakilan Anggota Individu Dan Urusan Mesyuarat Agung Kawasan.**

26. (1) Bagi maksud seksyen 37 Akta, Lembaga boleh menentukan kawasan-kawasan mesyuarat dan memanggil satu mesyuarat agung di tiap-tiap kawasan untuk memilih perwakilan bagi anggota individu ke mesyuarat agung perwakilan. Kawasan yang ditetapkan oleh Lembaga hendaklah seboleh-bolehnya berdasarkan wilayah di dalam susunan pentadbiran FELDA. Setiap kawasan hendaklah mempunyai sekurang-kurangnya satu ribu anggota.

(2) Bilangan perwakilan yang boleh dipilih bagi sesuatu kawasan adalah seperti berikut-

- (a) bagi tiap-tiap dua ratus orang anggota, seorang perwakilan;
- (b) lima orang anggota sebagai perwakilan ganti.

(3) Notis bagi mesyuarat agung kawasan hendaklah-

- (a) menentukan tarikh, masa, tempat dan agenda mesyuarat;
- (b) diberi kepada anggota yang layak dan tinggal dalam sesuatu kawasan tidak kurang daripada lima belas hari sebelum diadakan mesyuarat agung itu; dan

(c) disampaikan berasingan melalui pos atau dengan cara lain yang munasabah.

(4) Seseorang anggota yang telah menjelaskan bayaran menurut Undang-undang Kecil 16 pada tiga bulan sebelum tarikh mesyuarat agung kawasan berhak menerima notis untuk menghadiri mesyuarat agung kawasan dan berhak mempunyai satu undi dan layak menjadi seorang perwakilan ke sesuatu mesyuarat agung perwakilan.

(5) Seorang perwakilan akan kekal menjadi perwakilan selagi dia menjadi anggota koperasi ini sehingga mesyuarat agung kawasan yang akan datang untuk memilih perwakilan-perwakilan baru. Sekiranya perwakilan itu berhenti menjadi anggota atau menarik diri menjadi perwakilan, maka hilanglah haknya sebagai perwakilan kawasan yang berkenaan dan tempatnya akan digantikan oleh seorang perwakilan ganti yang akan ditentukan oleh Lembaga.

(6) Kuorum bagi mengadakan mesyuarat agung kawasan hendaklah satu pertiga daripada jumlah anggota yang layak menerima notis mesyuarat dalam kawasan yang berkenaan atau sepuluh orang, mana yang kurang. Sekiranya dalam masa tiga puluh minit selepas waktu yang ditetapkan bagi mesyuarat itu, bilangan anggota yang hadir belum mencukupi kuorum, maka mesyuarat itu hendaklah dibatalkan.

(7) Lembaga kemudiannya hendaklah memanggil satu mesyuarat lain dengan memberi notis seperti yang diperuntukkan menurut fasal (3). Sekiranya dalam masa tiga puluh minit selepas masa yang ditetapkan bagi mesyuarat ini, tidak hadir kuorum yang dikehendaki di bawah fasal (6), maka perwakilan tidaklah boleh dipilih dan hilanglah hak perwakilan kawasan itu.

(8) Seseorang anggota Lembaga yang diberikuasa oleh Mesyuarat Lembaga akan mempengerusikan sesuatu mesyuarat diperingkat kawasan. Anggota-anggota yang hadir di dalam mesyuarat agung kawasan hendaklah memilih di kalangan mereka seorang setiausaha untuk merekodkan segala butir-butir mesyuarat. Minit mesyuarat yang mengandungi semua keputusan mesyuarat termasuk nama-nama perwakilan dan perwakilan ganti hendaklah ditandatangani oleh pengerusi dan setiausaha mesyuarat itu dan hendaklah dikirimkan kepada Setiausaha koperasi ini dalam masa tujuh hari dari tarikh mesyuarat agung kawasan diadakan.

(9) Seseorang anggota tidak boleh melantik wakil untuk hadir atau mengundi bagi pihaknya dalam sesuatu mesyuarat agung kawasan.

(10) Seseorang anggota Lembaga hendaklah-

- (a) dianggap sebagai seorang perwakilan dalam mesyuarat agung perwakilan tahunan yang diadakan;
- (b) menjadi seorang perwakilan dalam mesyuarat agung perwakilan walaupun ia mengosongkan jawatan atau tidak dipilih sebagai Lembaga; dan
- (c) menjadi perwakilan sehingga mesyuarat agung kawasan terdekat.

(11) Menurut Peraturan, mesyuarat agung kawasan hendaklah diadakan sekurang-kurangnya dua tahun sekali iaitu selewat-lewatnya satu bulan sebelum mesyuarat agung perwakilan tahunan dan hendaklah menimbangkan perkara-perkara berikut-

- (a) akaun teraudit koperasi, jika tiada, draf akaun;
- (b) belanjawan tahunan untuk dibentangkan di mesyuarat agung perwakilan tahunan koperasi;
- (c) cadangan pindaan kepada Undang-undang Kecil Koperasi; jika ada;
- (d) melantik perwakilan dan perwakilan ganti ke mesyuarat agung perwakilan tahunan koperasi ini; dan
- (e) usul-usul daripada Lembaga dan anggota koperasi ini, jika ada, yang diterima selewat-lewatnya tujuh hari sebelum mesyuarat agung kawasan itu.

### **Kehadiran anggota secara proksi.**

27. (1) Menurut seksyen 31 Akta, sesuatu anggota hendaklah melantik seorang anggota Lembaganya sebagai perwakilan untuk menjadi proksinya bagi maksud mengundi, mengambil bahagian dalam perbahasan dan bertanding apa jua jawatan yang sesuai dalam mesyuarat agung perwakilan tahunan koperasi ini.

(2) Satu salinan keputusan pelantikan yang ditandatangani oleh pengerusi dan setiausaha sesuatu anggota hendaklah disampaikan kepada koperasi ini sekurang-kurangnya tujuh hari sebelum tarikh yang ditetapkan bagi mesyuarat agung perwakilan.

(3) Seorang perwakilan akan kekal menjadi perwakilan selagi dia menjadi anggota Lembaga sesuatu anggota. Sekiranya perwakilan itu terhenti menjadi anggota Lembaga sesuatu anggota atau menarik diri menjadi perwakilan, maka anggota berkenaan hendaklah melantik perwakilan yang baru untuk mewakilinya.

(4) Sesuatu anggota boleh dari semasa ke semasa membatalkan pelantikan perwakilannya dan melantik perwakilan yang baru. Satu salinan keputusan mengenai pembatalan pelantikan perwakilan sedia ada dan pelantikan perwakilan yang baru yang ditandatangani oleh pengerusi dan setiausaha anggota berkenaan hendaklah disampaikan kepada koperasi ini sekurang-kurangnya lima hari bekerja sebelum waktu yang ditetapkan bagi mesyuarat agung perwakilan itu.

### **Mesyuarat agung perwakilan tahunan.**

28. Mesyuarat agung perwakilan tahunan menurut subseksyen 39(1) Akta, hendaklah diadakan tidak lewat daripada enam bulan selepas berakhirnya setiap tahun kewangan atau tempoh yang lebih panjang sebagaimana yang diluluskan oleh Suruhanjaya.

### **Mesyuarat agung perwakilan khas.**

29. (1) Lembaga pada bila-bila masa boleh, atau apabila ada rekuisisi yang ditandatangani oleh sekurang-kurangnya satu perlima atau satu ratus perwakilan, mengikut mana yang kurang, hendaklah memanggil suatu mesyuarat agung perwakilan khas menurut subseksyen 40(1) Akta.

(2) Suruhanjaya atau mana-mana orang yang diberi kuasa oleh Suruhanjaya menurut subseksyen 40(2) Akta, boleh memanggil pada bila-bila masa suatu mesyuarat agung perwakilan khas, mengikut cara, masa dan tempat yang diarahkannya, dan boleh menentukan perkara-perkara yang hendaklah dibincangkan oleh mesyuarat itu, dan mesyuarat itu hendaklah mempunyai segala kuasa dan tertakluk kepada kaedah yang sama seperti mesyuarat agung perwakilan yang dipanggil menurut Akta atau Undang-undang Kecil ini.

**Notis mesyuarat agung perwakilan.**

30. (1) Notis bagi sesuatu mesyuarat agung perwakilan hendaklah diberi kepada perwakilan dalam tempoh tidak kurang daripada lima belas hari sebelum diadakan mesyuarat agung perwakilan itu.

(2) Notis hendaklah menentukan tarikh, masa, tempat dan agenda mesyuarat dan bagi mesyuarat agung perwakilan tahunan hendaklah disertakan-

- (a) akaun-akaun dan kunci kira-kira koperasi ini dan subsidiarinya, jika ada, yang teraudit;
- (b) belanjawan bagi tahun kewangan yang akan datang;
- (c) laporan Lembaga;
- (d) laporan Jawatankuasa Audit Dalaman; dan
- (e) dokumen-dokumen lain yang berkaitan.

(3) Satu salinan notis hendaklah dipamerkan di pejabat koperasi ini dan sebagai tambahan boleh juga diterbitkan di dalam mana-mana akhbar tempatan.

(4) Menurut seksyen 41 Akta, Lembaga hendaklah memberi kepada Suruhanjaya notis bertulis yang mengandungi maklumat berkaitan tarikh, masa, tempat dan agenda mesyuarat agung perwakilan yang akan diadakan oleh koperasi dalam tempoh tidak kurang daripada tiga puluh hari sebelum diadakan mesyuarat agung perwakilan itu.



### **Kuorum mesyuarat agung perwakilan.**

31. (1) Kuorum bagi sesuatu mesyuarat agung perwakilan bagi apa-apa maksud adalah seperti yang ditetapkan di bawah Peraturan.

(2) Kuorum bagi mesyuarat agung perwakilan kerana meminda Undang-undang Kecil ini, hendaklah dua pertiga dari jumlah perwakilan, melainkan kuorum terkurang dibenarkan oleh Suruhanjaya menurut Peraturan.

(3) Bagi sesuatu mesyuarat agung perwakilan khas yang dipanggil oleh Suruhanjaya menurut fasal (2) Undang-undang Kecil 29 yang ditunda-

- (a) kuorum hendaklah tidak kurang daripada dua kali ganda bilangan anggota Lembaga; dan
- (b) keputusan boleh dibuat dengan kelebihan undi dua pertiga daripada perwakilan yang hadir dan layak mengundi, menurut Peraturan.

### **Undi mesyuarat agung perwakilan**

32. (1) Semua perbahasan kecuali yang berkaitan dengan pindaan Undang-undang Kecil hendaklah diputuskan dengan majoriti mudah undi perwakilan yang hadir sebagaimana di dalam daftar kehadiran.

(2) Jika undi sama banyak, maka usul yang diundi itu hendaklah disifatkan kalah. Perwakilan yang berkecuali dianggap tidak menyokong usul itu.

(3) Pengerusi mesyuarat tidak mempunyai undi pemutus.

### **Pembatalan dan penangguhan mesyuarat agung perwakilan tahunan.**

33. (1) Jika selepas tiga puluh minit daripada waktu yang ditetapkan bagi sesuatu mesyuarat agung perwakilan tahunan itu bilangan perwakilan yang hadir masih belum mencukupi kuorum, maka mesyuarat agung perwakilan tahunan itu hendaklah dibatalkan dan hendaklah dipanggil semula oleh Lembaga dalam tempoh tiga puluh hari dari tarikh mesyuarat agung perwakilan yang dibatalkan dengan membincangkan fungsi mesyuarat yang sama.

(2) Mesyuarat agung perwakilan tahunan boleh ditangguhkan dengan persetujuan mesyuarat-

- (a) dalam tempoh tujuh hari dari tarikh mesyuarat asal;
- (b) di dalam kawasan operasi koperasi; dan
- (c) bagi menjalankan urusan mesyuarat yang asal sahaja.

(3) Notis tidak perlu bagi mesyuarat yang ditangguhkan itu.

**Pembatalan dan tundaan mesyuarat agung perwakilan khas.**

33A. (1) Jika selepas tiga puluh minit daripada waktu yang ditetapkan bagi sesuatu mesyuarat agung perwakilan khas itu bilangan perwakilan yang hadir masih belum mencukupi kuorum, maka mesyuarat agung perwakilan itu-

- (a) dibatalkan, jika dipanggil oleh Lembaga atau atas rekuisisi perwakilan; atau
- (b) ditunda, jika dipanggil oleh Suruhanjaya menurut subseksyen 40(2) Akta.

(2) Bagi mesyuarat yang ditunda menurut perenggan (b) fasal (1)-

- (a) tarikh mesyuarat tertunda hendaklah tidak kurang daripada empat belas hari tetapi tidak lebih daripada tiga puluh hari; dan
- (b) notis penundaan hendaklah diposkan dalam tempoh tujuh hari dari tarikh mesyuarat yang ditunda.

(3) Perkara-perkara yang telah dicadangkan bagi mesyuarat agung perwakilan khas yang ditunda hendaklah dibincangkan pada mesyuarat tertunda itu. Jika terdapat perubahan kepada perkara-perkara yang telah dicadangkan itu, notis baru menurut fasal (1) Undang-undang Kecil 30 hendaklah diberi kepada tiap-tiap perwakilan bagi mesyuarat tertunda itu.

## **Fungsi mesyuarat agung perwakilan.**

34. (1) Menurut Peraturan, fungsi mesyuarat agung perwakilan hendaklah termasuk yang berikut-

- (a) mengesahkan minit mesyuarat agung perwakilan tahunan yang terdahulu dan mana-mana mesyuarat agung perwakilan khas yang berselang;
- (b) menimbang laporan-laporan Lembaga dan Jawatankuasa Audit Dalaman;
- (c) menimbang dan meluluskan akaun-akaun teraudit koperasi dan subsidiarinya, jika ada, bersama dengan laporan juruaudit;
- (d) memilih anggota Lembaga;
- (e) menimbang dan meluluskan belanjawan tahunan bagi tahun kewangan yang akan datang;
- (f) meluluskan elaun kepada anggota Lembaga dan saraan kepada anggota Lembaga yang dilantik sebagai pengarah bagi subsidiari koperasi, jika ada;
- (g) meluluskan pelantikan satu panel yang terdiri daripada tidak kurang daripada dua firma audit untuk mengaudit akaun-akaun koperasi;
- (h) menimbang dan meluluskan skop dan had pelaburan daripada wang berlebihan koperasi;
- (i) menentukan had maksimum keterhutangan koperasi;
- (j) melantik suatu jawatankuasa yang terdiri daripada enam orang perwakilan dan empat orang anggota Lembaga untuk menentusahkan draf minit mesyuarat agung perwakilan tahunan;
- (k) menimbang dan meluluskan pembahagian keuntungan;
- (l) mengisytihar atau menerbitkan syer bonus, jika ada;

- (m) mendengar, menimbang atau memutuskan apa-apa usul atau urusan lain koperasi yang suatu notis yang tidak kurang daripada tujuh hari telah diberikan;
- (n) menimbang dan meluluskan apa-apa cadangan pindaan kepada Undang-undang Kecil koperasi, jika ada;
- (o) mendengar dan memutuskan apa-apa aduan, yang suatu notis yang tidak kurang daripada tujuh hari telah dikemukakan kepada koperasi yang dikemukakan oleh anggota yang terkilan dengan sesuatu keputusan Lembaga;
- (p) meluluskan apa-apa perbelanjaan kepada Jawatankuasa Audit Dalaman; dan
- (q) menimbang dan meluluskan apa-apa laporan yang hendak dikemukakan menurut Akta dan Peraturan, jika ada.

(2) Perkara-perkara menurut perenggan (a), (b), (c), (d) dan (e) fasal (1) hendaklah diputuskan di dalam mesyuarat agung perwakilan tahunan atau mesyuarat agung perwakilan khas yang dipanggil oleh Suruhanjaya menurut subseksyen 40(2) Akta.

(3) Minit-minit mesyuarat agung perwakilan hendaklah direkodkan dan satu salinan hendaklah diserahkan kepada Suruhanjaya dalam tempoh tiga puluh hari selepas tarikh mesyuarat agung perwakilan itu, menurut perenggan 14(1)(b) Akta.

(4) Mesyuarat agung perwakilan boleh menamatkan pelantikan kesemua atau mana-mana anggota Lembaga dengan syarat usul secara bertulis telah diterima oleh koperasi dalam tempoh tujuh hari sebelum mesyuarat agung perwakilan diadakan. Sebarang usul tergepar tidak dibenarkan.

### **Pengerusi mesyuarat agung perwakilan.**

35. Pengerusi koperasi hendaklah mempengerusikan sesuatu mesyuarat agung perwakilan. Jika pengerusi koperasi tidak hadir, maka seorang anggota Lembaga yang dipilih oleh mesyuarat agung hendaklah mempengerusikan mesyuarat agung perwakilan.

### **Lembaga Koperasi**

36. (1) Lembaga koperasi hendaklah mengandungi dua belas orang yang terdiri daripada –

- (a) 9 orang perwakilan yang dipilih oleh mesyuarat agung perwakilan, menurut seksyen 42 Akta dan perenggan (d) fasal (1) Undang-undang Kecil 34; dan
- (b) 3 orang anggota atau perwakilan yang dilantik oleh Lembaga FELDA, tertakluk kepada pengesahan mesyuarat agung perwakilan.

(2) Walau apapun peruntukkan Undang-undang Kecil ini dan tertakluk kepada Undang-undang Kecil 11 dan Undang-undang Kecil 37, 3 orang anggota yang dilantik oleh Lembaga FELDA akan memegang jawatan sebagai Pengerusi, Setiausaha dan Bendahari koperasi.

### **Kelayakan menjadi anggota Lembaga.**

37. Tiada seorang pun layak menjadi anggota Lembaga atau kekal sebagai seorang anggota Lembaga, jika dia-

- (a) telah disabitkan atas suatu kesalahan di bawah Akta;
- (b) telah dipecat sebagai seorang pegawai sesuatu koperasi;
- (c) menjadi anggota Jawatankuasa Audit Dalaman bagi koperasi ini;
- (d) ada percanggahan kepentingan diri dalam mana-mana aktiviti yang diusahakan oleh koperasi ini;

- (e) dalam hal dia seorang anggota koperasi ini, belum genap tempoh dua tahun menjadi anggota koperasi ini; atau
- (f) dalam hal dia seorang perwakilan kepada sesuatu anggota;
  - (i) dia belum genap tempoh dua tahun menganggotai sesuatu anggota yang telah didaftarkan melebihi dua tahun; atau
  - (ii) dia tidak memegang jawatan sebagai anggota Lembaga sesuatu anggota.

### **Tempoh Memegang Jawatan Anggota Lembaga.**

38. (1) Satu pertiga daripada anggota Lembaga menurut perenggan (a) fasal (1) Undang-undang Kecil 36 hendaklah mengosongkan jawatan secara bergilir-gilir pada tiap-tiap mesyuarat agung perwakilan tahunan.

(2) Aturan yang ditetapkan menurut fasal (1) hendaklah diulangi bergilir-gilir tiap-tiap tahun bagi dua pertiga anggota Lembaga yang selainnya supaya pada permulaan tahun keempat atau lebih awal daripada itu, kesemua anggota Lembaga hendaklah telah mengosongkan jawatan masing-masing sekurang-kurangnya sekali dalam tempoh tiga tahun sebelum itu.

(3) Anggota Lembaga menurut perenggan (b) fasal (1) Undang-undang Kecil 36 hendaklah mengosongkan jawatan pada tiap-tiap mesyuarat agung perwakilan tahunan.

(4) Pelantikan seseorang anggota Lembaga yang dibuat menurut perenggan 69(1)(iv)(B) Akta tidak tertakluk kepada fasal (2).

(5) Kekosongan jawatan anggota Lembaga menurut perenggan (a) fasal (1) Undang-undang Kecil 36 hendaklah diisi oleh Lembaga dalam tempoh enam puluh hari dari tarikh kekosongan itu dengan melantik mana-mana perwakilan yang berkelayakan dan perkhidmatan anggota Lembaga itu hendaklah tamat pada mesyuarat agung perwakilan akan datang.

(6) Kekosongan jawatan anggota Lembaga menurut perenggan (b) fasal (1) Undang-undang Kecil 36 hendaklah dalam tempoh enam puluh hari dari tarikh

kekosongan itu diisi oleh Lembaga dari kalangan anggota/perwakilan yang dilantik oleh FELDA.

### **Lucut Dan Penggantungan Jawatan Anggota Lembaga.**

39. (1) Seseorang anggota Lembaga akan lucut jawatannya dengan sertamerta jika-

- (a) dia disabitkan atas kesalahan boleh daftar atau kesalahan menurut Akta atau Peraturan;
- (b) dia menerima apa-apa pelantikan tetap yang bergaji dalam koperasi ini;
- (c) dia tidak hadir di dalam mesyuarat Lembaga tiga kali berturut-turut, melainkan dengan sebab-sebab yang boleh diterima oleh Lembaga yang telah dimaklumkan terlebih dahulu;
- (d) dalam hal dia seorang anggota, dia hilang kelayakan sebagai anggota menurut fasal (1) Undang-undang Kecil 20 atau terhenti keanggotaan menurut Undang-undang Kecil 21; atau
- (e) dalam hal dia seorang perwakilan kepada sesuatu anggota, anggota yang diwakilinya hilang kelayakan sebagai anggota menurut fasal (2) Undang-undang Kecil 20 atau terhenti keanggotaan menurut Undang-undang Kecil 21.

(2) Seseorang anggota Lembaga hendaklah digantung dari jawatannya jika-

- (a) sesuatu langkah perbicaraan diambil terhadap anggota Lembaga itu mengenai sesuatu kesalahan boleh daftar atau sesuatu kesalahan menurut subseksyen 47(1) Akta; atau
- (b) majoriti anggota Lembaga berpuas hati bahawa anggota Lembaga itu telah bertindak dengan cara yang memudaratkan kepentingan koperasi ini, menurut Peraturan.

(3) Tiap-tiap kes penggantungan menurut perenggan (b) fasal (2), hendaklah-

- (a) didengar oleh mesyuarat agung perwakilan yang terawal diadakan selepas penggantungan itu;
- (b) anggota Lembaga itu telah diberitahu secara bertulis akan kesalahannya dalam masa tujuh hari sebelum diadakan mesyuarat agung perwakilan;
- (c) anggota Lembaga itu diberi peluang membela diri dalam mesyuarat agung perwakilan tersebut; dan
- (d) keputusan penggantungan anggota Lembaga tersebut hendaklah tertakluk kepada pengesahan atau pengetepian oleh majoriti perwakilan yang hadir di dalam mesyuarat agung perwakilan itu.

#### **Penamatan pelantikan anggota Lembaga.**

40. (1) Walau apa pun peruntukan fasal (1) Undang-undang Kecil 38, mesyuarat agung perwakilan mempunyai kuasa menurut Peraturan-

- (a) untuk menamatkan pelantikan mana-mana atau kesemua anggota Lembaga pada bila-bila masa; dan
- (b) memilih gantinya dengan syarat bahawa usul secara bertulis untuk menamatkan pelantikan anggota Lembaga itu hendaklah disampaikan kepada koperasi dalam tempoh tujuh hari sebelum mesyuarat agung perwakilan itu diadakan.

(2) Keputusan untuk menamatkan pelantikan seseorang atau kesemua anggota Lembaga hanya boleh dibuat selepas mesyuarat agung perwakilan itu mendengar penjelasan anggota Lembaga yang terlibat.

(3) Anggota Lembaga yang ditamatkan pelantikannya menurut Undang-undang Kecil ini tidak boleh dilantik semula sehingga mesyuarat agung perwakilan tahunan yang akan datang.

(4) Perenggan (b) fasal (1) adalah tidak terpakai bagi penamatan pelantikan anggota Lembaga yang dilantik oleh FELDA menurut perenggan (b) fasal



(1) Undang-undang Kecil 36. Jika sekiranya mana-mana atau kesemua anggota Lembaga yang dilantik oleh FELDA ditamatkan pelantikannya menurut fasal (1), Lembaga hendaklah memilih gantinya dalam tempoh enam puluh hari dari tarikh mesyuarat agung perwakilan yang berkenaan dari kalangan anggota atau perwakilan yang dinamakan oleh FELDA.

### **Mesyuarat Lembaga**

41. (1) Mesyuarat Lembaga pertama hendaklah –
- (a) diadakan sebaik sahaja selesai mesyuarat agung perwakilan tahunan;
  - (b) mengesahkan pelantikan seorang pengerusi, setiausaha dan bendahari dari kalangan anggota Lembaga yang dilantik oleh Lembaga FELDA.
- (2) Mesyuarat Lembaga yang berikutnya hendaklah diadakan sekurang-kurangnya sekali dalam tempoh tiga bulan.
- (3) Mesyuarat Lembaga hendaklah juga diadakan sekiranya-
- (a) Suruhanjaya mengeluarkan arahan; atau
  - (b) enam orang anggota Lembaga membuat permintaan bertulis tidak kurang daripada tiga puluh hari menyatakan perkara-perkara yang hendak dibincangkan.
- (4) Keputusan mesyuarat Lembaga adalah sah walaupun-
- (a) ketidakhadiran mana-mana anggota Lembaga;
  - (b) terdapat kecacatan yang kemudiannya diketahui dalam pelantikan atau kelayakan mana-mana anggota Lembaga atau pembentukan Lembaga;
  - (c) terdapat peninggalan, kecacatan atau salah aturan mesyuarat; atau

- (d) kehadiran atau penyertaan seseorang yang bukan anggota Lembaga.
- (5) Lembaga boleh mengundang mana-mana orang ke mesyuarat dan beliau-
- (a) boleh memberi nasihat berkenaan dengan apa-apa perkara yang dibincangkan;
  - (b) tidak boleh mengundi; dan
  - (c) boleh dibayar elaun atau perbelanjaan lain sebagaimana yang ditentukan oleh Lembaga.
- (6) Semasa ketiadaan pengerusi, seorang daripada anggota Lembaga lain yang hadir boleh dipilih untuk mempengerusikan mesyuarat.

#### **Kuorum mesyuarat Lembaga**

42. Kuorum mesyuarat Lembaga hendaklah melebihi satu perdua daripada bilangan anggota Lembaga menurut fasal (1) Undang-undang Kecil 36.

#### **Urusan Mesyuarat Lembaga.**

43. Urusan mesyuarat Lembaga hendaklah termasuk yang berikut-
- (a) mengesahkan minit mesyuarat Lembaga terdahulu;
  - (b) membincangkan perkara berbangkit;
  - (c) mengkaji, membincang, menimbang dan memutuskan di mana berkenaan, perkara-perkara berikut-
    - (i) keputusan-keputusan mesyuarat agung perwakilan dan menentukan tindakan-tindakan;
    - (ii) laporan Jawatankuasa Audit Dalaman;
    - (iii) laporan pengurusan;

- (iv) permohonan menjadi anggota koperasi;
  - (v) permohonan berhenti daripada menjadi anggota;
  - (vi) permohonan pembiayaan Islam dan kemudahan kredit daripada anggota;
  - (vii) permohonan menambah atau mengurangkan ansuran pinjaman; dan
  - (viii) permohonan menambah atau mengurangkan caruman syer atau yuran.
- (d) membentang dan meluluskan kedudukan kewangan bulanan;
  - (e) mengkaji, membincang dan memutuskan cadangan projek koperasi;
  - (f) mengkaji, membincang dan memutuskan-
    - (i) hal-hal perjawatan;
    - (ii) program latihan pekerja; dan
    - (iii) program pendidikan anggota.
  - (g) melantik Jawatankuasa Audit Dalaman menurut Undang-undang Kecil 51; dan
  - (h) menjalankan apa-apa urusan lain dengan memberi notis tidak kurang daripada tujuh hari melainkan dipersetujui sebaliknya.

**Resolusi pekeliling Lembaga.**

43A. Lembaga boleh membuat keputusan menerusi resolusi pekeliling Lembaga yang perlu dipersetujui dan ditandatangani oleh semua Anggota Lembaga secara bersama atau berasingan dalam perkara-perkara yang dinyatakan oleh Undang-undang Kecil 43.

#### **Undi anggota Lembaga.**

44. (1) Semua usul dan cadangan hendaklah diputuskan dengan majoriti mudah undi anggota Lembaga yang hadir.

(2) Jika bilangan undi sama banyak, maka usul atau cadangan yang diundi itu tidak diterima.

(3) Seseorang anggota Lembaga tidak boleh mengundi dalam perkara mengenai dirinya sendiri atau ia ada kepentingan peribadi.

(4) Seseorang anggota Lembaga yang ada kepentingan peribadi dalam perkara yang akan dipertimbangkan oleh mesyuarat hendaklah mengisytiharkan sepenuhnya kepada Lembaga mengenai penglibatan atau kepentingannya dalam perkara itu.

(5) Fasal 1 dan Fasal 2 Undang-undang Kecil 44 tidak terpakai pada Undang-undang Kecil 43A.

#### **Buku minit mesyuarat Lembaga.**

45. (1) Segala keputusan mesyuarat Lembaga hendaklah-

- (a) diminitkan dalam tempoh tujuh hari;
- (b) ditandatangani oleh setiausaha mesyuarat itu; dan
- (c) diedarkan kepada anggota Lembaga dalam tempoh empat belas hari.

(2) Minit yang telah disahkan dalam mesyuarat berikutnya hendaklah ditandatangani oleh pengerusi mesyuarat tersebut.

- (3) Minit bagi sesuatu mesyuarat Lembaga hendaklah diserahkan-
  - (a) kepada Suruhanjaya menurut perenggan 14(1)(c) Akta; dan
  - (b) dalam tempoh tiga puluh hari selepas tarikh mesyuarat itu.

**Kuasa dan kewajipan Lembaga.**

46. (1) Lembaga bertanggungjawab memastikan pentadbiran dan pengurusan koperasi dikendalikan dengan teratur, menurut subseksyen 44(1) Akta.

(2) Bagi melaksanakan tanggungjawab menurut fasal (1), Lembaga hendaklah mempunyai kuasa dan kewajipan yang berikut-

- (a) melantik seorang pengerusi, setiausaha dan bendahari di dalam mesyuarat Lembaga yang diadakan menurut perenggan (b) fasal (1) Undang-undang Kecil 41;
- (b) mengemukakan suatu senarai anggota Lembaga yang mengandungi butir-butir berikut-
  - (i) nama;
  - (ii) alamat kediaman;
  - (iii) nombor kad pengenalan;
  - (iv) tarikh keanggotaan;
  - (v) pekerjaan;
  - (vi) anggota yang diwakilinya, jika ada; dan
  - (vii) jawatan dalam koperasi,

dalam tempoh lima belas hari selepas mesyuarat agung perwakilan tahunannya kepada Suruhanjaya menurut perenggan 14(1)(a) Akta. Apa-apa perubahan tentang butir-butir berkenaan hendaklah dimaklumkan kepada Suruhanjaya secara bertulis dalam tempoh lima belas hari dari tarikh berlakunya perubahan tersebut;

- (c) menimbang dan menerima permohonan keanggotaan;
- (d) meluluskan dan mengesahkan pemindahan dan penebusan syer anggota;
- (e) melantik-
  - (i) seorang pegawai yang bergaji tetap; atau
  - (ii) sebuah firma,

bagi menjalankan mana-mana daripada tugas setiausaha, jika perlu, dengan syarat pegawai yang dilantik itu tidak boleh menjadi anggota Lembaga;

- (f) menyenggara akaun bagi wang yang diterima dan yang dibelanjakan atas nama koperasi dengan benar dan betul;
- (g) menyenggara akaun bagi aset dan liabiliti koperasi dengan benar dan betul;
- (h) membenarkan perbelanjaan, menyemak dan mengawasi semua akaun, buku, rekod serta dokumen koperasi yang disenggara, diuruskan dengan sempurna dan kemaskini;
- (i) membentangkan kepada mesyuarat agung perwakilan tahunan-
  - (i) akaun perdagangan;
  - (ii) akaun untung rugi;
  - (iii) apa-apa penyata sebagaimana yang ditentukan oleh Suruhanjaya;
  - (iv) kunci kira-kira;
  - (v) laporan Lembaga menurut subseksyen 59(3) Akta;
  - (vi) laporan juruaudit; dan

- (vii) pandangan Suruhanjaya tentang akaun dan kunci kira-kira, jika ada; bagi koperasi dan subsidiari;
- (j) membuat perakuan pembahagian keuntungan bersih dan pengisytiharan syer bonus koperasi, jika ada, kepada mesyuarat agung perwakilan tahunan;
- (k) mengambil tindakan sewajarnya ke atas penyata dan surat arahan Suruhanjaya atau wakilnya;
- (l) membentang laporan Jawatankuasa Audit Dalaman dalam mesyuarat agung perwakilan tahunan;
- (m) memenuhi jawatan kosong yang berlaku di dalam Lembaga, menggantung keanggotaan anggota dan anggota Lembaga serta menyingkirkan keanggotaan menurut fasal (2) Undang-undang Kecil 21 dan melucutkan jawatan anggota Lembaga;
- (n) memanggil mesyuarat agung perwakilan menurut Undang-undang Kecil;
- (o) membuat perjanjian bagi mendapatkan pembiayaan tertakluk kepada kelulusan mesyuarat agung perwakilan;
- (p) melantik pekerja termasuk pengurus dengan mengeluarkan surat rasmi yang mengandungi terma dan syarat perkhidmatan selaras dengan peruntukan undang-undang yang berkaitan;
- (q) bertindak atas nama dan bagi pihak koperasi atau melantik seseorang wakil bagi menyelesaikan segala pertikaian koperasi atau menjalankan dan memberhentikan mana-mana tindakan mahkamah;
- (r) melabur wang berlebihan menurut keputusan mesyuarat agung perwakilan dan tertakluk kepada peruntukan Akta dan Peraturan;

- (s) mengkaji dan merancang projek yang memberi manfaat kepada anggota dan koperasi dengan melaksanakan projek mengikut keputusan mesyuarat agung perwakilan;
- (t) melaksanakan projek dan memberi peluang kepada anggota untuk-
  - (i) mengambil bahagian dalam pelaksanaan projek; atau
  - (ii) menyumbangkan modal tambahan atau simpanan khas sebagaimana yang dipersetujui;
- (u) memasuki perjanjian bagi pihak koperasi dan dimeterai dengan mohor koperasi serta ditandatangani oleh pengerusi, setiausaha dan bendahari atau pegawai yang diberi kuasa oleh Lembaga;
- (v) melantik wakil di kalangan anggota Lembaga atau pegawai koperasi untuk menghadiri mesyuarat mana-mana koperasi yang dianggotainya;
- (w) menubuhkan jawatankuasa, jika perlu, bagi menjalankan aktiviti koperasi dengan sempurnanya dan mewakilkan kuasa kepadanya dari semasa ke semasa mengikut keputusan Lembaga;
- (x) membuat aturan aktiviti dari semasa ke semasa bagi pelaksanaan aktiviti koperasi dengan kelulusan mesyuarat agung perwakilan dan mengemukakan satu salinannya dalam tempoh tiga puluh hari kepada Suruhanjaya menurut fasal (3) Undang-undang Kecil 9;
- (y) mencadangkan belanjawan termasuk elaun kepada anggota Lembaga dan Jawatankuasa Audit Dalaman untuk dibentangkan di mesyuarat agung perwakilan tahunan koperasi;
- (z) mencadangkan saraan kepada anggota Lembaga yang dilantik sebagai pengarah bagi subsidiari koperasi untuk dibentangkan di mesyuarat agung perwakilan tahunan koperasi;



- (aa) mengawasi kecekapan, tatatertib dan daya usaha semua pegawai dan pekerja koperasi dalam menunaikan tugas dan tanggungjawab mereka;
- (bb) memastikan tadbir urus korporat dan pengurusan risiko yang baik dilaksanakan oleh pengurusan koperasi dalam pelaksanaan tugas dan tanggungjawab mereka;
- (cc) memastikan kerahsiaan maklumat perniagaan koperasi dan anggotanya terpelihara; dan
- (dd) melaksanakan tugas lain sebagaimana yang ditentukan oleh Akta, Peraturan, perintah, garis panduan, arahan Suruhanjaya, Undang-undang Kecil dan mesyuarat agung perwakilan dari semasa ke semasa.

(3) Lembaga hendaklah seawal mungkin dari semasa ke semasa mengisytiharkan kepentingannya sekiranya terdapat sebarang konflik kepentingan dan/atau potensi untuk konflik kepentingan dengan koperasi dan tidak akan terlibat dalam pengundian dan perbincangan mengenai perkara di mana dia mempunyai kepentingan dan/atau berpotensi untuk mempunyai kepentingan.

#### **Liabiliti anggota Lembaga.**

47. Lembaga hendaklah berhemat dan bertekun seperti ahli perniagaan yang biasa dan hendaklah bertanggung secara bersama dan berasingan bagi apa-apa kerugian yang ditanggung oleh koperasi atas sebab kegagalan mereka berhemat dan bertekun sedemikian atau oleh sebab apa-apa perbuatan yang bertentangan dengan peruntukan Akta, Peraturan, Perintah, peruntukan undang-undang yang berkaitan atau Undang-undang Kecil ini serta aturan aktiviti yang dibuat di bawahnya atau arahan mesyuarat agung perwakilannya.

#### **Tugas Pengerusi.**

48. (1) Pengerusi hendaklah menjalankan tugas seperti berikut-
- (a) mempengerusikan semua mesyuarat Lembaga;
  - (b) menandatangani minit mesyuarat yang disahkan;

- (c) memperakui cabutan dan salinan dari rekod koperasi menurut Peraturan, bersama setiausaha melalui satu akuan yang bertarikh dan ditandatangani;
- (d) memanggil sendiri atau melalui setiausaha, mesyuarat Lembaga bila perlu;
- (e) mengarahkan Jawatankuasa Audit Dalaman supaya memeriksa buku, rekod dan dokumen koperasi pada bila-bila masa dan melaporkan kepada Lembaga;
- (f) menandatangani permohonan pendaftaran kepada pindaan Undang-undang Kecil dan dokumen lain yang berkaitan bersama dua anggota Lembaga; dan
- (g) menyelia secara am pentadbiran, hal-ehwal dan pekerja koperasi.

(2) Semasa ketiadaan pengerusi, tugas pengerusi menurut perenggan (a) dan (b) fasal (1) boleh diamanahkan kepada mana-mana anggota Lembaga lain, jika perlu.

### **Tugas setiausaha.**

49. (1) Setiausaha hendaklah menjalankan tugas seperti berikut-
- (a) memanggil dan menghadiri mesyuarat agung perwakilan, mesyuarat Lembaga dan mesyuarat jawatankuasa dan menyampaikan segala laporan dan dokumen untuk pertimbangan mesyuarat-mesyuarat itu;
  - (b) merekodkan perjalanan dan keputusan sesuatu mesyuarat;
  - (c) menyenggara dan mengemaskini semua daftar anggota, daftar penama, buku dan laporan yang dikehendaki oleh Lembaga;
  - (d) menguruskan surat-menyurat sebagaimana yang diarahkan oleh Lembaga;

- (e) mengesahkan bersama pengerusi salinan segala perkara yang bertulis di dalam buku koperasi;
- (f) menyimpan dan menjaga dengan selamatnya mohor koperasi; dan
- (g) menjalankan tugas lain yang ditentukan oleh Lembaga dari semasa ke semasa.

(2) Mana-mana tugas setiausaha boleh diamanahkan kepada pengurus atau pekerja tertakluk kepada persetujuan Lembaga.

### **Tugas bendahari.**

50. (1) Bendahari hendaklah menjalankan tugas seperti berikut-

- (a) mengendalikan segala urusan perdagangan dan perindustrian koperasi mengikut dasar yang ditetapkan oleh Lembaga;
- (b) menerima dan menjaga semua wang yang diterima oleh koperasi dan membuat pembayaran mengikut arahan Lembaga;
- (c) menyimpan ke dalam bank atas nama koperasi semua wang yang diterima dalam tempoh dua puluh empat jam hari bekerja daripada penerimaannya;
- (d) mengeluarkan resit, menyediakan baucar dan surat lain mengikut arahan Lembaga;

- (e) menyimpan dalam Akaun Wang Runcit, wang sebanyak yang diluluskan oleh Lembaga untuk memenuhi perbelanjaan runcit dan perbelanjaan yang dibuat daripada akaun ini boleh diganti seberapa kerap yang perlu;
- (f) menyenggara dan menyimpan akaun koperasi dengan sempurna dan kemaskini supaya dapat diperiksa pada bila-bila masa oleh pihak berkuasa yang berkenaan;
- (g) menyediakan akaun tahunan dan laporan tahunan koperasi untuk dibentangkan dalam mesyuarat Lembaga;
- (h) menyediakan belanjawan tahunan koperasi dalam bentuk yang menunjukkan dengan jelas segala butiran pendapatan dan perbelanjaan untuk ditimbang oleh Lembaga sebelum dibentangkan dalam mesyuarat agung perwakilan tahunan; dan
- (i) menyediakan penyata pendapatan dan perbelanjaan koperasi yang benar dengan secara dibutirkan satu persatu bagi sesuatu tempoh sebagaimana yang dikehendaki oleh Lembaga untuk dibandingkan dengan belanjawan bagi tempoh berkenaan yang telah diluluskan oleh mesyuarat agung perwakilan.

(2) Mana-mana tugas bendahari boleh diamanahkan kepada pengurus atau pekerja tertakluk kepada persetujuan Lembaga.

#### **Jawatankuasa Audit Dalaman.**

51. Menurut subseksyen 42A(1) Akta, Jawatankuasa Audit Dalaman koperasi hendaklah mengandungi tidak lebih lima orang, terdiri daripada anggota atau Perwakilan sesuatu anggota yang dilantik oleh Lembaga, menurut perenggan (g) Undang-undang Kecil 43.

#### **Kelayakan menjadi Jawatankuasa Audit Dalaman.**

52. Tiada seorang pun layak menjadi Jawatankuasa Audit Dalaman atau kekal sebagai seorang anggota Jawatankuasa Audit Dalaman jika-

- (a) dia telah disabitkan atas suatu kesalahan di bawah Akta;

- (b) dia telah dipecat sebagai seorang pegawai sesuatu koperasi;
- (c) dia menjadi anggota Lembaga koperasi ini; atau
- (d) dalam hal dia seorang perwakilan kepada sesuatu anggota,
  - (i) dia tidak lagi memegang jawatan sebagai anggota Lembaga sesuatu anggota; atau
  - (ii) anggota yang diwakilinya hilang kelayakan sebagai anggota menurut fasal (2) Undang-undang Kecil 20 atau terhenti keanggotaan menurut Undang-undang Kecil 21.

### **Tempoh memegang jawatan Jawatankuasa Audit Dalaman.**

53. (1) Tempoh perkhidmatan semua anggota Jawatankuasa Audit Dalaman ini adalah satu tahun atau sehingga mesyuarat agung perwakilan akan datang, mana yang terdahulu. Perkhidmatan mereka boleh disambung semula setelah diputuskan oleh mesyuarat Lembaga.

(2) Kekosongan dalam Jawatankuasa Audit Dalaman hendaklah diisi Lembaga dalam tempoh tiga puluh hari dari tarikh pengosongan jawatan dengan melantik mana-mana anggota atau perwakilan kepada sesuatu anggota yang layak.

### **Kuasa dan kewajipan Jawatankuasa Audit Dalaman.**

54. (1) Jawatankuasa Audit Dalaman hendaklah mempunyai kuasa untuk memeriksa segala rekod perakaunan dan rekod lain yang berhubungan secara langsung atau tidak langsung dengan koperasi dan subsidiarinya, jika ada, bagi memastikan hal-ehwal koperasi dijalankan mengikut matlamat penubuhan, Undang-undang Kecil serta keputusan mesyuarat agung perwakilan.

(2) Jawatankuasa Audit Dalaman mempunyai kuasa memanggil mana-mana orang yang dikehendakinya supaya mengemukakan atau menyerahkan apa-apa maklumat atau buku, akaun dan dokumen yang berkaitan.

(3) Jawatankuasa Audit Dalaman hendaklah menjalankan tugas seperti berikut-

- (a) memastikan adanya kuasa dan kesahan bagi segala perbelanjaan;
  - (b) memeriksa akaun-akaun koperasi pada lat-lat masa yang tetap dan tidak boleh kurang daripada sekali dalam tempoh tiga bulan;
  - (c) memberitahu Lembaga apa-apa ketidakselarasan yang berlaku dalam pengurusan koperasi dengan serta-merta; dan
  - (d) mengemukakan kepada Lembaga laporan mengenai pengurusan dan hal-ehwal koperasi termasuk pelanggaran terhadap Akta, Peraturan atau Undang-undang Kecil.
- (4) Jawatankuasa Audit Dalaman, tertakluk kepada kelulusan Lembaga dibayar elaun yang sewajarnya atas khidmat yang diberikan kepada koperasi.
- (5) Jawatankuasa Audit Dalaman hendaklah-
- (a) bersidang tidak kurang daripada dua kali setahun; dan
  - (b) mengemukakan laporan bertulis kepada Lembaga dan Suruhanjaya.

## BAHAGIAN VI

### ASET DAN WANG KOPERASI

#### **Wang Dan Kumpulan Wang Koperasi.**

55. (1) Wang dan kumpulan wang koperasi boleh mengandungi-
- (a) fi masuk, syer dan yuran anggota;
  - (b) simpanan khas daripada anggota;
  - (c) pembiayaan atau deposit daripada anggota dan bukan anggota;
  - (d) Kumpulan Wang Rizab Statutori;
  - (e) Akaun Rizab Modal;
  - (f) Kumpulan Wang Penebusan Syer;
  - (g) derma dan pemberian tertentu;
  - (h) baki keuntungan terkumpul; dan
  - (i) kumpulan wang lain yang diluluskan oleh mesyuarat agung perwakilan.

(2) Kumpulan wang koperasi selain daripada Kumpulan Wang Rizab Statutori boleh digunakan bagi melaksanakan aktiviti menurut fasal (1) Undang-undang Kecil 9.

#### **Modal Syer.**

56. (1) Menurut perenggan 50(b) Akta, setiap anggota hendaklah melanggan syer seperti berikut sebagai sumbangan minimumnya –
- (a) dalam hal seseorang individu, sebanyak RM100.00 (Ringgit Malaysia-seratus); dan

- (b) dalam hal koperasi asas atau koperasi menengah, sebanyak RM1,000.00 (Ringgit Malaysia-seribu).

Syer minimum ini hendaklah dijelaskan dalam tempoh menurut fasal (2) dan tidak boleh dikeluarkan kecuali selepas keanggotaan anggota itu tamat.

(2) Tempoh menjelaskan syer minimum menurut fasal (1) adalah sebagaimana berikut –

- (a) seseorang individu atau sesuatu koperasi asas atau koperasi menengah yang turut sama dalam permohonan pendaftaran koperasi ini dan yang telah menandatangani minit mesyuarat agung perwakilan permulaan koperasi hendaklah menjelaskan syernya dalam tempoh tiga bulan dari tarikh perakuan pendaftaran diterima oleh koperasi; dan
- (b) seseorang individu atau sesuatu koperasi asas atau koperasi menengah yang diterima menjadi anggota mengikut Undang-undang Kecil 15 hendaklah menjelaskan syernya dalam tempoh tiga bulan dari tarikh penerimaannya sebagai anggota.

(3) Mana-mana anggota yang gagal melanggan syer menurut fasal (1) hendaklah disingkirkan.

## **Yuran**

57. Melainkan diberikan pengecualian oleh Suruhanjaya atau diputuskan sebaliknya, yuran bulanan seseorang anggota seperti yang diperuntukkan menurut perenggan 50(c) Akta hendaklah sekurang-kurangnya RM30.00 (Ringgit Malaysia-tiga puluh) sebulan. Seseorang anggota boleh membuat bayaran yuran yang lebih mengikut aturan jimat-cermat dan pinjam-meminjam yang dibuat oleh Lembaga dengan kelulusan mesyuarat agung perwakilan.

## **Simpanan khas, deposit atau pembiayaan.**

58. (1) Koperasi boleh menerima daripada anggotanya-
- (a) simpanan khas seperti yang dalam aturan-aturannya dan wang ini boleh dikeluarkan dari semasa ke semasa; atau



(b) deposit dan pembiayaan.

(2) Koperasi boleh, dengan kelulusan Suruhanjaya, menerima deposit atau pembiayaan daripada bukan anggota koperasi.

(3) Fasal (2) tidak terpakai kepada deposit atau pembiayaan yang diberikan oleh kerajaan.

(4) Pada setiap mesyuarat agung perwakilan tahunan, koperasi hendaklah-

(a) memberitahu mengenai pinjaman daripada anggota menurut subseksyen 52(3) Akta; dan

(b) menetapkan had maksimum keterhutangan yang sedia ada dan yang baru akan ditanggung dalam tahun akan datang.

#### **Pindahan syer.**

59. (1) Seseorang atau sesuatu anggota boleh memindahkan syernya yang melebihi sumbangan minimum menurut fasal (1) Undang-undang Kecil 56 kepada anggota lain dengan menandatangani borang pemindahan syer. Borang pemindahan syer bagi sesuatu anggota hendaklah ditandatangani oleh pengerusi, setiausaha dan seorang anggota Lembaga atau pegawai yang diberi kuasa oleh mesyuarat Lembaga.

(2) Pindahan syer tersebut hanya akan berkuatkuasa setelah didaftarkan oleh koperasi

(3) Syer seseorang anggota yang mati boleh dipindahkan kepada penama. Bagi anggota Muslim, pemindahan tersebut hendaklah menurut fasal (1) Undang-undang Kecil 18.

(4) Pemindahan syer tersebut bagi seseorang anggota hendaklah dibuat dalam tempoh enam bulan selepas kematian anggota itu.

#### **Penyelesaian modal syer.**

60. (1) Jika pemindahan syer tidak dapat dibuat menurut Undang-undang Kecil 59, bagi seseorang anggota atau sesuatu koperasi yang tamat keanggotaannya oleh apa-apa sebab jua pun, maka syernya yang diperihalkan di dalam Undang-undang Kecil itu boleh dikeluarkan tertakluk kepada fasal (2).

(2) Syer boleh ditebus dari Kumpulan Wang Penebusan Syer dan Kumpulan Wang Rizab Statutori tertakluk kepada Peraturan. Nilai tebusan syer ini hendaklah mengikut sebagaimana yang ditunjukkan dalam akaun teraudit terakhir bagi koperasi akan tetapi tidak boleh melebihi nilai asalnya.

(3) Syer yang ditebus menurut fasal (2) boleh jika diluluskan oleh mesyuarat agung perwakilan, diterbitkan semula sebagai syer bonus.

**Keuntungan modal.**

61. (1) Menurut subseksyen 55(1) Akta, semua keuntungan modal yang diperolehi daripada perkara-perkara berikut hendaklah dikreditkan ke Akaun Rizab Modal-

- (a) penjualan tanah atau bangunan, atau kedua-duanya sebagai aset tetap; dan
- (b) penilaian semula tanah atau bangunan, atau kedua-duanya, sebagai aset tetap, dengan kelulusan Suruhanjaya.

(2) Keuntungan modal menurut perenggan (a) fasal (1) boleh, jika diluluskan oleh mesyuarat agung perwakilan, digunakan bagi semua atau mana-mana maksud yang berikut-

- (a) penerbitan syer bonus;
  - (b) penghapusan kira kerugian terkumpul;
  - (c) penghapusan kira kerugian modal; dan
  - (d) pewujudan suatu Kumpulan Wang Penebusan Syer Bonus.
- (3) Syer bonus boleh diterbitkan menurut Peraturan berasaskan kepada-
- (a) jumlah syer yang dipegang oleh tiap-tiap anggota; atau

(b) penerbitan semula daripada syer bonus yang ditebus, dengan syarat-

(i) syer menurut perenggan (a) dan (b), dipegang dalam tempoh masa dua belas bulan sebelum tarikh pengisytiharan syer bonus;

(ii) nama anggota yang akan menerima syer ada dalam daftar koperasi pada tarikh pengisytiharan syer bonus;

(iii) semua kerugian terkumpul dan semasa telah dihapuskan; dan

(iv) buku dan rekod koperasi telah disenggara dengan memuaskan menurut pendapat Suruhanjaya.

(4) Syer bonus yang diterbitkan daripada keuntungan modal menurut perenggan (b) fasal (1) boleh dengan kelulusan Lembaga-

(a) dipindahkan kepada anggota lain koperasi ini; atau

(b) dikeluarkan, dalam hal anggota yang mati atau dibatalkan pendaftarannya di bawah Akta.

(5) Pemindahan atau pengeluaran menurut fasal (4) dibayar daripada Kumpulan Wang Penebusan Syer Bonus Koperasi.

### **Kumpulan Wang Rizab Statutori**

62. (1) Menurut subseksyen 57(1) Akta, koperasi ini hendaklah menyenggarakan satu Kumpulan Wang Rizab Statutori.

(2) Koperasi hendaklah memindahkan suatu jumlah wang ke Kumpulan Wang Rizab Statutori berdasarkan jadual di bawah-

<b>Jumlah Terkumpul Kumpulan Wang Rizab Statutori</b>	<b>Jumlah Pindahan</b>
Kurang daripada 50% daripada syer dan yuran	Tidak kurang 25% daripada untung bersih teraudit
50% tetapi kurang daripada 100% daripada syer dan yuran	Tidak kurang 15% daripada untung bersih teraudit

(3) Kumpulan Wang Rizab Statutori tidak boleh dibahagi dan tidak ada anggota yang berhak untuk menuntut suatu bahagian tertentu daripadanya.

(4) Koperasi boleh membuat pembayaran balik syer dan yuran daripada Kumpulan Wang Rizab Statutori, dan pada setiap masa baki dalam kumpulan wang tersebut hendaklah tidak kurang daripada lima belas peratus daripada jumlah syer dan yuran koperasi ini.

#### **Simpanan khas.**

63. Menurut perenggan 50(d) Akta, koperasi boleh menerima simpanan khas tertakluk kepada terma dan syarat-syarat yang dibuat menurut fasal (4) Undang-undang Kecil 9.

#### **Pinjaman luar.**

64. (1) Tertakluk kepada subseksyen 52(2), seksyen 52A Akta dan Peraturan, koperasi boleh, dengan kelulusan Suruhanjaya, meminjam wang daripada bukan anggota koperasi.

(2) Koperasi hendaklah memaklumkan kepada anggotanya mengenai pinjaman menurut fasal (1) pada mesyuarat agung perwakilan tahunannya.

#### **Pelaburan wang.**

65. (1) Wang berlebihan koperasi boleh dilabur tertakluk kepada peruntukan seksyen 54 Akta dan Peraturan.

(2) Had maksimum yang boleh dilaburkan oleh koperasi bagi sesuatu maksud hendaklah ditentukan oleh mesyuarat agung perwakilan.

### **Pemberian pembiayaan oleh koperasi**

66. Menurut seksyen 51 Akta, koperasi boleh memberi apa-apa pembiayaan Islam atau kemudahan kredit lain kepada-

- (a) anggotanya, tertakluk kepada terma dan syarat-syarat yang ditetapkan dalam aturan yang diluluskan oleh mesyuarat agung perwakilan;
- (b) pekerjanya, termasuk ketua pegawai eksekutif tertakluk kepada terma dan syarat-syarat guna khidmat mereka; atau
- (c) subsidiarinya atau koperasi lain, tertakluk kepada kelulusan Suruhanjaya.

### **Pengagihan untung bersih teraudit.**

67. (1) Keuntungan bersih teraudit koperasi seperti yang ditunjukkan dalam akaun untung rugi menurut seksyen 56 Akta, hendaklah diagihkan, tertakluk kepada seksyen 57 Akta, seperti berikut-

- (a) sebanyak mana yang ditentukan menurut fasal (2) Undang-undang Kecil 62 kepada Kumpulan Wang Rizab Statutori; dan
- (b) sebanyak mana yang ditentukan dari semasa ke semasa oleh Suruhanjaya dibayar kepada Kumpulan Wang Amanah Pendidikan Koperasi dan Kumpulan Wang Amanah Pembangunan Koperasi.

Disyaratkan bahawa menurut subseksyen 57(4) Akta, boleh ditolak apa-apa bayaran yang dibuat menurut perenggan (b) fasal (1) daripada jumlah wang menurut perenggan (a) fasal (1).

(2) Selepas pengagihan menurut fasal (1), dan peruntukan cukai pendapatan, jika ada, baki untung bersih teraudit, termasuk baki keuntungan yang belum dibahagikan menurut subseksyen 57(5) Akta, boleh digunakan bagi semua atau mana-mana maksud yang berikut-

- (a) pembayaran potongan langganan;

- (b) pembayaran dividen atas syer dan yuran anggota sebagaimana yang ditentukan oleh arahan atau garis panduan;
- (c) pembayaran honorarium kepada anggota Lembaga yang tidak boleh, bagaimanapun, melebihi jumlah wang yang disyorkan oleh mesyuarat agung perwakilan tahunan dan diluluskan oleh Suruhanjaya; atau
- (d) pembayaran untuk kebajikan anggotanya dan masyarakat.

(3) Pembayaran dividen daripada mana-mana sumber selain untung bersih teraudit bagi tahun kewangan itu tidak boleh dibuat kecuali dengan mendapat kelulusan bertulis terlebih dahulu daripada Suruhanjaya, yang tidak boleh dalam mana-mana hal melebihi apa-apa kadar maksimum sebagaimana yang ditentukan dalam arahan atau garis panduan.

(4) Menurut subseksyen 57(7) Akta, bayaran kepada perkara-perkara menurut perenggan (b) fasal (1), fasal (2) dan (3), boleh dibuat hanya jika semua kerugian terkumpul telah dihapuskan sepenuhnya.

(5) Dengan kelulusan Suruhanjaya, koperasi boleh, sekiranya kerugian terkumpul tidak dihapuskan sepenuhnya, menggunakan untung bersih terauditanya untuk pembayaran dividen kepada anggotanya yang tidak boleh melebihi lima peratus daripada jumlah syer atau yuran anggota atau kedua-duanya, menurut subseksyen 57(8) Akta.

### **Dividen.**

68. (1) Kadar dividen yang dibayar atas syer dan yuran kepunyaan anggota pada enam bulan sebelum akhir tahun kewangan menurut Peraturan, hendaklah tidak melebihi sepuluh peratus kecuali dengan kelulusan Suruhanjaya. Anggota yang namanya tidak ada di dalam daftar anggota koperasi pada tarikh akhir tahun kewangan yang berkenaan tidak layak menerima dividen.

(2) Dividen hendaklah dikreditkan seperti berikut sekiranya anggota itu tidak meminta dibayar kepadanya secara tunai dalam tempoh tiga puluh hari dari tarikh dividen itu diisytiharkan –

- (a) dalam hal sesuatu anggota, ke akaun modal syernya; dan
- (b) dalam hal seseorang anggota, ke akaun modal yurannya.

## BAHAGIAN VII

### AKAUN DAN AUDIT

#### **Tahun Kewangan.**

69. Tahun kewangan koperasi ini bermula pada satu haribulan Januari dan berakhir pada tiga puluh satu haribulan Disember setiap tahun.

#### **Penyenggaraan akaun.**

70. (1) Menurut seksyen 58 Akta, Lembaga hendaklah menyenggara dengan sempurna dan kemaskini rekod-rekod perakaunan dan rekod-rekod lain mengenai tiap-tiap transaksi dan kedudukan kewangan koperasi dan subsidiarinya, jika ada, yang berkaitan dengan-

- (a) aset tetap, pelaburan dan deposit;
- (b) syer, yuran serta simpanan khas yang dicarum oleh anggota; dan
- (c) aktiviti-aktiviti yang dijalankan.

(2) Catatan dalam rekod perakaunan dan rekod-rekod lain menurut fasal (1) hendaklah dibuat dengan seberapa segera tetapi tidak lewat daripada tiga puluh hari dari selesai sesuatu transaksi, menurut subseksyen 58(2) Akta.

(3) Penyediaan akaun-akaun iaitu akaun perdagangan, untung rugi dan kunci kira-kira hendaklah dibuat dengan seberapa segera tetapi tidak lewat daripada dua bulan selepas tamatnya tahun kewangan supaya dapat diaudit.

(4) Akaun-akaun menurut fasal (3) yang telah diaudit hendaklah dibentangkan di dalam mesyuarat agung perwakilan tidak lewat daripada enam bulan selepas tamatnya tahun kewangan itu.

(5) Rekod perakaunan menurut fasal (1) hendaklah disimpan-

(a) di pejabat berdaftar koperasi pada sepanjang masa atau di mana-mana tempat lain yang difikirkan patut oleh Lembaga, menurut subseksyen 58(4) Akta; dan

(b) selama enam tahun selepas diaudit menurut Peraturan.

(6) Rekod-rekod ini boleh diperiksa oleh seseorang anggota atau individu yang diberi kuasa oleh sesuatu anggota pada bila-bila masa mengikut syarat-syarat pemeriksaan yang ditetapkan oleh Lembaga.

(7) Lembaga boleh melantik mana-mana individu atau firma untuk mengemaskinikan rekod perakaunan bagi memastikan rekod tersebut dapat diaudit dalam tempoh yang ditetapkan.

(8) Suruhanjaya boleh, menurut subseksyen 58(5) Akta, dalam kes-kes tertentu memerintahkan supaya rekod-rekod perakaunan koperasi diserahkan untuk diperiksa oleh seseorang juruaudit yang bertindak bagi pihak anggota atau pegawai.

(9) Suatu senarai terperinci butir-butir perbelanjaan Lembaga dan bayaran kepada atau bagi pihak anggota individu Lembaga dan jawatankuasa hendaklah dimasukkan dalam nota kepada akaun untung rugi koperasi, menurut Peraturan.

#### **Resit-resit dan baucar.**

71. (1) Resit-resit koperasi hendaklah dikeluarkan bagi semua wang atau penerimaan lain seperti cek dan wang pos yang diterima. Resit-resit itu hendaklah ditandatangani oleh bendahari atau pegawai yang diberi kuasa oleh Lembaga dari semasa ke semasa.

(2) Baucar hendaklah disediakan bagi setiap pembayaran yang dibuat oleh koperasi. Baucar tersebut hendaklah ditandatangani atau diluluskan oleh bendahari atau pengurus serta disahkan oleh pegawai yang diberi kuasa oleh Lembaga dari semasa ke semasa.



### **Pelantikan dan kewajipan juruaudit.**

72. (1) Lembaga hendaklah melantik seorang juruaudit yang diluluskan oleh Suruhanjaya bagi mengaudit akaun koperasi, menurut perenggan 60(1)(a) Akta.

(2) Juruaudit yang dilantik menurut fasal (1) hendaklah dipilih oleh mesyuarat Lembaga daripada panel yang diluluskan oleh mesyuarat agung perwakilan dan mengemukakan satu salinan suratcara pelantikan kepada Suruhanjaya, menurut Peraturan.

(3) Juruaudit berkewajipan untuk mengaudit akaun dan rekod koperasi dan hendaklah memberi laporan mengenai penyata kewangan yang dikemukakan oleh koperasi selepas berakhirnya tahun kewangan itu untuk perhatian Suruhanjaya serta anggota koperasi, menurut seksyen 63 Akta.

### **Penyerahan buku dan dokumen untuk diaudit.**

73. Menurut Peraturan, suatu senarai buku dan dokumen koperasi hendaklah disediakan oleh koperasi dan diserahkan kepada juruaudit untuk ditandatangani sebagai pengakuan penerimaannya. Sesalinan senarai itu hendaklah disimpan oleh koperasi.

### **Mengemukakan penyata kewangan dan laporan kepada perwakilan.**

74. Satu salinan penyata berikut hendaklah disampaikan kepada tiap-tiap perwakilan tidak lewat daripada lima belas hari sebelum mesyuarat agung perwakilan tahunan-

- (a) akaun perdagangan;
- (b) akaun untung rugi;
- (c) apa-apa penyata sebagaimana yang ditentukan oleh Suruhanjaya;
- (d) kunci kira-kira dan laporan Lembaga mengenai kedudukan hal-ehwal koperasi dan subsidiari yang telah dikemukakan untuk mendapat pandangan Suruhanjaya, menurut subseksyen 59(2) Akta;
- (e) laporan juruaudit; dan
- (f) laporan Jawatankuasa Audit Dalaman.

## BAHAGIAN VIII

### PELBAGAI

#### **Akaun bank.**

75. Akaun bank bagi koperasi hendaklah diuruskan oleh mana-mana orang iaitu pengerusi atau setiausaha dan bendahari atau dua orang pegawai lain yang diberi kuasa oleh Lembaga dari semasa ke semasa.

#### **Mohor dan dokumen koperasi**

76. (1) Koperasi ini hendaklah mempunyai satu mohor. Mohor ini tidak boleh dimeteraikan di atas mana-mana surat melainkan dengan keputusan Lembaga. Pengerusi, setiausaha, bendahari atau mana-mana anggota Lembaga atau mana-mana pegawai lain yang diberi kuasa oleh Lembaga dikehendaki menurunkan tandatangan mereka di atas tiap-tiap surat yang hendak dimeteraikan.

(2) Dokumen yang diperbuat atas nama koperasi sama ada dimeteraikan atau tidak, dan ditandatangani dengan sahnya oleh pengerusi, setiausaha, bendahari atau mana-mana anggota Lembaga atau mana-mana pegawai lain yang diberi kuasa oleh Lembaga hendaklah disifatkan mengikat ke atas koperasi melainkan dibuktikan sebaliknya.

#### **Pertukaran alamat anggota.**

77. Tiap-tiap anggota hendaklah memberitahu setiausaha akan pertukaran alamatnya dalam tempoh tiga puluh hari. Semua surat kepada anggota yang dihantar dengan pos atau dikirimkan kepada alamatnya yang terakhir hendaklah dianggap sebagai telah disampaikan.

#### **Penyediaan dokumen untuk diperiksa.**

78. (1) Menurut seksyen 13 Akta, koperasi hendaklah menyediakan perkara berikut yang terbuka untuk diperiksa oleh seseorang anggota atau individu yang diberi kuasa oleh sesuatu anggota sahaja tanpa apa-apa bayaran, pada masa-masa yang munasabah di alamat berdaftar koperasi-

- (a) suatu salinan Akta dan Peraturan atau perintah, arahan atau garis panduan;
- (b) suatu salinan Undang-undang Kecil dan akaun teraudit yang terakhir;
- (c) suatu senarai anggota;
- (d) suatu senarai anggota Lembaga;
- (e) nama ketua pegawai eksekutif, jika ada; dan
- (f) suatu senarai pegawai koperasi yang berkenaan dengan pengurusan koperasi, jika ada.

(2) Koperasi hendaklah juga menyediakan aturan-aturan aktiviti untuk diperiksa oleh anggota, jika ada.

### **Penyerahan tugas.**

79. Penyerahan tugas hendaklah dilakukan secara bertulis apabila berlaku pertukaran bagi apa-apa jawatan dalam koperasi dan disempurnakan dalam tempoh tidak lewat daripada empat belas hari selepas berkuatkuasanya pertukaran itu.

### **Laporan oleh seseorang yang dilantik mewakili koperasi**

80. (1) Seseorang yang dilantik untuk mewakili koperasi di dalam apa-apa mesyuarat, seminar, forum atau lawatan sambil belajar atas perbelanjaan koperasi sama ada di dalam atau di luar negeri, menurut Peraturan, hendaklah mengemukakan laporan ringkas kepada mesyuarat agung perwakilan tahunan yang akan datang yang terawal diadakan bagi koperasi.

(2) Jika orang itu gagal mengemukakan laporan, dia hendaklah membayar balik semua perbelanjaan yang telah ditanggung oleh koperasi. Koperasi berhak mendapatkan balik setiap perbelanjaan tersebut seolah-olah ianya suatu hutang yang kena dibayar kepada koperasi

### **Pelantikan Yang Dipertua.**

81. Lembaga boleh melantik seorang kenamaan sebagai Yang Dipertua kepada koperasi. Dia hanya bertindak sebagai penaung dan boleh menghadiri mana-mana mesyuarat yang diadakan oleh koperasi tetapi tidak mempunyai hak untuk mengundi.

### **Pertikaian.**

82. (1) Segala pertikaian menurut subseksyen 82(1) Akta, yang menyentuh hal penubuhan, Undang-undang Kecil, pemilihan pegawai, perjalanan mesyuarat agung, pengurusan atau perniagaan koperasi hendaklah dirujuk kepada Suruhanjaya, menurut Peraturan.

(2) Mana-mana anggota yang dibuktikan telah membuat pengaduan atau merujuk pertikaiannya kepada mana-mana orang selain daripada Suruhanjaya hendaklah dianggap telah bertindak dengan cara yang memudaratkan kepentingan koperasi dan boleh dikenakan tindakan menurut Undang-undang Kecil 23.

(3) Segala pertikaian selain daripada yang dinyatakan menurut subseksyen 82(1) Akta hendaklah dirujuk kepada mesyuarat agung perwakilan koperasi untuk penyelesaian. Apa-apa pertikaian yang tidak dapat diselesaikan hendaklah diputuskan oleh Suruhanjaya dan keputusannya adalah muktamad.

### **Mendapatkan khidmat nasihat daripada FELDA.**

83. Lembaga boleh mendapatkan khidmat nasihat daripada FELDA dalam urusan hal ehwal kewangan dan pelaburan koperasi ini.

### **Pemeliharaan kerahsiaan.**

84. Anggota Lembaga, pegawai, pekerja, juruaudit atau mana-mana orang yang mempunyai akses kepada maklumat mana-mana anggota yang diperolehi dalam melaksanakan perniagaan atau tugas dengan koperasi, tidak boleh digunakan untuk kepentingan peribadi dan tidak boleh dizahirkan kepada mana-mana orang tanpa izin anggota melainkan yang dibenarkan oleh undang-undang bertulis.

**Pembubaran.**

85. Koperasi hanya boleh dibubarkan dengan perintah Suruhanjaya.

**Akta, Peraturan dan Undang-undang Kecil.**

86. (1) Undang-undang Kecil ini adalah dibuat menurut Peraturan dan hendaklah tertakluk kepada peruntukan Akta dan Peraturan. Apa-apa pindaan kepada Undang-undang Kecil ini tidak boleh dibuat melainkan dengan kehendak atau kebenaran Suruhanjaya. Aturan aktiviti tidak boleh dibuat melainkan dengan kelulusan mesyuarat agung perwakilan.

(2) Apa-apa urusan koperasi hendaklah tertakluk kepada Akta, Peraturan dan Undang-undang Kecil serta aturan aktiviti dan hendaklah dibaca bersekali.

**Undang-undang Kecil hendaklah mengikat anggota.**

87. Menurut seksyen 17 Akta, Undang-undang Kecil ini hendaklah mengikat koperasi dan anggotanya sehingga takat yang sama seolah-olah Undang-undang Kecil ini telah ditandatangani oleh tiap-tiap anggota dan mengandungi waad pada pihak tiap-tiap anggota untuk mematuhi segala peruntukan Undang-undang Kecil ini.

Diakui bahawa Pindaan Undang-undang Kecil ini telah dibentang, dibincang dan diterima di dalam Mesyuarat Agung Perwakilan Tahunan Koperasi Permodalan FELDA Malaysia Berhad yang diadakan pada empat belas haribulan Jun dua ribu lima belas.

Disahkan oleh-

KOPERASI PERMODALAN FELDA MALAYSIA BERHAD

.....  
Pengerusi

.....  
Setiausaha

.....  
Bendahari